


निजराणा

सत्यप्रकाश जोशी की कवितावा

राजस्थानी सिरजणधारा-अंक





सत्यप्रकाश जोशी री कवितावां
सम्पादकः चेतन स्वामी

राजस्थानी भासा साहित्य अँव सस्कृति अकादमी, बीकानेर

मोल : साठ रिपिमा

राजस्थानी भा. सा. स. अकादमी सू कानी छपी/पैलो सस्करण-1990/सगळा इधवार : अकादमी रा/
आवरण : अमित भारती/मुद्रक : सोधला प्रिण्टर्स, मुगत निवास, चन्दन सागर, बीकानेर

NIZARANNO (Poetry) by Satya Prakash Joshi Edited by Chetan Swami
Rs. 60.00

प्रकासक कांनीं सूं

राजस्थानी भासा, साहित्य अँव संस्कृति अकादमी, बीकानेर रो धरपणा रँ पछै सूं ई पोथी प्रकासण रँ भतै उदासीन रवैयो रँयो । अकादमी री नूवी कार्यकारिणी अर सामान्य सभा इण रवैयँ माथै गभीरता सूं विचार कियो अर चालू रोकड वरस में की पोथ्यां छापण रो निरण लियो है । इणी निरण रँ तहत राजस्थानी रा चावा-ठावा कवि सत्यप्रकास जोसी री टाळवी कवितावां री आ पोथी 'निजराणो' पाठकां नै निजर कर रँया हां ।

राजस्थानी समकालीन कविता रँ छेतर मे श्रीजोसी अँक नूवी भाव भूमि तयार कीवी है जिकी कविता री असल पिछाण रँ रूप आपारै सांम्है है । जोसी रो भासाई सिल्प तो घणो रळकवां है । राजस्थानी अकादमी श्रीजोसी री टाळवी कवितावां रो ओ संग्रह 'राजस्थानी सिरजण धारा' प्रकासणमाळा रँ पँलड़ै पुसब रँ रूप प्रकासित कर रँई है । सिरजण धारा योजना में केई दूजी पोथ्यां ई बैगी ई पाठकां रँ हाथां मे होवैला ।

पतियारो राखा ओ 'निजराणो' पाठका नै दाय आवैला

छारडी, 90

वेद व्यास

अध्यक्ष

राजस्थानी भासा, साहित्य अँव
संस्कृति अकादमी बीकानेर, (राज.)

विगत

● संपादकीय दीठ 7

● सत्यप्रकाम जोसी रो कवितावां

● राघा

पैला पैत 14, बदनामी 18, ब्याव 20, विदा 24, जुष 25

● दीवा कापे क्यू

गीतां रो जस 32, सोवन माछळी 36, जागण रो गीत 37, जीवण रा दीया 38

● बोल भारमली

अपरच 42, रूप 46, सावो 47, सचाग 49, जाळो 52, विराग 56, अढवाणो 57, प्रीत 59, आप 62, साख राजा मालदेव री 64, साख राणी उमादे रो 65, अंताखरी 67

● गांगेय

तलाक री तांत 70, बाप रा ब्याव मे बेटो विनायक 74, प्रीत रो पराछीत 78, फूलां मरां तीरां मरां कोनी 82, मां घारी गोद निवाई अे 84

● आगत-अणगत

अगवाणी 90, ओळख 91, उतारो 92, मोत 94, जामण नै....98, जामण नै 99, घीयां नै 100, घर 101, कचरा री कांण 102, भूगोल रा बंद 103

● आहूतियां

वन 106, संभावना 107, कल्पना 108, बाळपण 108, भरोसो 109, हरख 110, पाप बोध 111, त्याग 112, प्रेरणा 113, तिरस 114, संकोच 115, उपज 116, खेम 117, गाढ 118, ईसको 118, बस्ती 119, न्याज 120, आज्ञादी 121, प्राधना 122

● पुजापो

सनेसो 124, बे हो 125, बोलो 125, मिलण 126, कामण 127, हठ 129, बोरो 130, माध्यम 130, हरख 131, परस 132, बस्ती 133, कुण 134, भूलणो 135, पुजापो 136

संपादकीय दीठ

फगत म्हें ई क्यूँ, अक मोटो राजस्थानी पाठक वर्ग है जिको सत्यप्रकाश जोसी री कवितावां बांच बांच नै फेर बांचै अर जिती वार बांचै निरवाळी अणभव हेमाणी अंबेरें । घणा निजू क्षणा में जोसीजी री कवितावां रा नैना टुकड़ा आपरी खिमता रा नगारा घमकावै । ऊमर रँ परवाण न्यारा अरथ संदर्भा रँ सार्ग ऊभी होवै—अे कवितावां । इणनै अेक कवि री घणी मोटी अर गीरबैजोग हांसल कैवा तो कठै ई असंगत बात नी होवै ।

जोसीजी कनै कविता री जिको 'क्लासिक फॉर्म' है वो नीं 'आज' सूं जुदा है, नी 'काल' सूं अल्लगो । कविता में जिकी खास चीज होया करै—मायलो लगाव, उणरी अपड़-पकड़ जोसीजी कनै खूब-खूब । लमकारी रँ नतँ, आनुप्रासिक बधेज तो बांरी हरेक कविता री पंगत-पंगत मे सैचरूड़ होवै । लोक मानस रा इण कवि कनै आपरी सबदा-वळी है—जिकी जमीन रा लोगां सूं जमीन री वाणी में बोलै-बतळावै ।

'राधा' सूं 'पुजापो' तांई री काव्य जात्रा में भलाई सिल्पगत बदलाव आपानै निगै आवै पण बांर रचनात्मक मूल्या रँ 'इन्प्रेशन्स' में कठै ई फोर-बदल नी दीखै । हा, भौतिकता रँ खोड (जंगल) री डरावणोपण जोसी रँ कवि नै ऊमर रँ इण पड़ाव पूगतां, ज्यादा 'प्रोडेक्टिव' बणा देवै । भौतिकता रँ प्रसार रा विरोधी नीं है जोसी-पण, वै उण विरती रा घोर विरोधी है—जिकी मिनख री देह सूं काळजो काढ लेवै । बांनै सार्ग कै विग्यान री वेगवान विरती लोगां रा काळजा काढ रँई है अर बां री कवितावा रा हथियार लोगां नै

काळजा विहूण होवण सूरू रोक रेंया है। वारी इण समस्टि समझ नै ऊपर-ऊपर सूरू जोया लागै के वैं कोई रूपवादी मोदयें बोध रा कवि है पण वारी रचना मे कठै ई व्यक्तिगत 'आणंद अर धाप' जैड़ी प्रवृत्ति नी है। वैं समाज सांग प्रकृति रै जड-चेतन री गनो (रिम्तां) दर ई नी भूल पावै। ओ ई वारी सोदयें बोध है।

काव्यकला मे मानवीय मूल्या रा हिमायती जोसी, राग-द्वेष हरस-सोग नैं काम-क्रोध जैडा मनोविकारां नैं मिनतारी संघ्या सूरू जोड'र देरी अर वारै बोचला अन्तर्विरोधां री पडताल ई 'अहंवादी' होयनै ना करै। पाच दसका रैं काव्य जीवन मे जोसीजी रैं कवि नैं 'व्यक्तिवाद' सूरू कोई खतरो नी होयो, वारी आस्था अर सोदयेंबोध दीठ हरमेग नैतिक-सासता जीवन मूल्यां रैं पल मे रैई। सत्यप्रकास जोसी अेक लावै असैं ताई मच रा चावा कवि ई रेंया है इण वास्तै 'मंच संस्कृति' रा रातरा सूरू वैं ई मेईज (प्रमित) सकै हा पण अँडो कुजोग ना मधियो अर वैं आपरै कवि रैं ऊजळे अर अबोट मिनग री रिछ्या करली। कैयो जावैं के कला रैं मानवीयकरण सूरू मिनखा री भावनावा नैं तिरपती मिलै। अेक कल्ला-जीवी सारू इण सूरू मोटो निजराणो काईं हावैं, के वो आपरै काम सूरू भावनावां री विकास करै, जिको हर भात-समाज रैं विकास सूरू जुडघोडो होवै।

लगै टगै आजादी रैं पछै सूरू सरू होई जोसीजी री काव्य यात्रा। हिन्दी-राजस्थानी मे छुट-पुट गीतां रैं सांग ई वां री राजस्थानी जगत मांय घमाकंदार परवेस होयो। घमाकंदार इण नतै के आजादी रा गीत गावणवाळा कवियां रैं प्रयोजण धरमी काव्य माय कविता आपरी पिछाणगत अनुरंजनी चैरै नै कठै ई लुकायां बँठी ही—'न कान्तमपि-निर्भूषणं विभाती वनिता मुखम्' (वाल्ही घण री मुँडो ई बिना सिणगार तो अलूणो)। मंच रैं खंदोळचां चडनै कविता उण वगत फगत भाव नैं भूल विचार नैं क्षाला देय रैई ही। या पछै की लोग पारंपरिक बीर रस के सिणगार रा ई रसिया वण रेंया हा। राजस्थानी कविता जिण भासा अर मुहावरै रैं ढब ढळ रैई ही उण नैं 'समकालीण समझ' अर 'तरास' रैं गेलै लावण में जोसीजी री सिरै हाथ रेंयो। मंच जोसीजी री ई की दिनां ताई माध्यम रेंयो पण वारै खातर कविता फगत मन बिलमाळ रिगल नी रैई, वैं इण नैं महताळ क्रियेशन मान्यो अर मंच री इस्तेमाल ई उण दीठ सूरू करघो।

स्वर री प्रभाव घणो चिमतकारी नैं वसीकरण जैडो होवै। विचारक काँडवेल री ओ मानणो वाजब ई है के 'कविता री सनमन उपेजो करण वाळी मेणत सूरू ई होवै।' कविता मिनख नैं संस्कारित करै अर उणरो

वैचारिक नै भौतिक विकास ई करै । मिनख रो मँणत सूं रिस्तो नै मँणत रो लय सूं संगोठो अर लय कविता री सिरै जरूत । जोसीजी कविता रें इण आदू गणित नै बिसरायो नीं । लोक री सांस्कृतिक चेतना नै जगावण सारू जिण ढव अर सिल्प री जरूत होवै बी जरूत नै जोसीजी खास-खास मंसूस कीबी अर लोकगीतां रें सलूणै सिल्प नै आपरी कविता रो मुहावरो बणायो । लोक साहित्य री अद्भुत सम्प्रेसणीय सगति नै ओळखी अर उणरा वैं तत्व जिका समाज नै समाज रा आखा कारज बीपारां सूं सँमुडै करै—जाण लैवणा किणी साधना सूं कम नीं है । लोकगीतां रें सिल्प नै अंगेज लेवणो तो फगत चतराई रो काम होय सकै पण वा री 'पूग' (एप्रोच) री बुनियाद लग पूगणो सहज नै सहजो काम नीं है । लोकमानस रें इण चितैरै नै लोकगीतां रो पाँवरफुल कन्टेन्ट हर रचना मे अखरावणी देवतो रैयो ।

'राधा' भारतीय साहित्य री बेजोड काव्य कृति है । यू तो राधा क्रिसण री हेजाळू वायेली है पण जद वा आपरै 'कमगर' हाथा सूं भांत-भांत रा धरू काम करै तो मँणत री पूतळी ई लागै अर मँणत नै ई वा पूजा जाणै । श्रम रें पछै रो सुख, उणरै रूँ-रूँ सूं ढुळै । सुख-सौरप सारू राधा अकली धणियाणी बणन रो मतो नीं राखै । क्रिसण जे सुख रो लेरको है तो, वा चावै इण लेरकै सूं आखो जगत आपरा प्राण सरसावै । राधा आखा जगत नै आपरै आवगै सांस्कृतिक सरूप सागै सरस-सलूणो देखणी चावै । क्रिसण सूं जगत नै विध्वंस सूं बचावण सारू हाथ जोड़-जोड़ नै जुध जेडी आमुरी विरतियां परिया राखण री टैर ई इण काव्य रो असली मकसद है । क्रिसण सिरजणकारी सगतियां है नै राधा जीवण रा सांस्कृतिक मोल । जोसीजी रें इण काव्य सूं जिकी अमर 'पारस्थितिकी' चेतावणियां प्रगासीजी है, वैं आज पल पल किती जरूरी बणती जा रैई है इण नै आपा सहज ई समझ सकां ।

'दीवा कापै क्यू' रा सगळा ई गीत सत्यप्रकाश जोसी री सरूआती पिछाण रा लोवडा थंभ है । कविता री सासताई रा पक्का प्रमाण अँ गीत मिनख री उण अबोट घणियाप रा गीत है जिकी निरजीव बीजा मे प्राणां रो संचार करै नै जिकी इण रूपाळै संसार री धड़कना नै आपरै मांय धडकावै । गीतां रें जस रा बलाण तो चावै करियां ई जावो क्यू के गीत ई तो होवै जिको रेंणादे रें खोळै सोनल भांण जलमावै अर अंधारै री ओवरियां ग्यांन री पीलजोत जगावै । सबद, विचार, भावनावां री भेळप सूं कविता रो जलम होवै । हिड़दै अर मगज रो ताळमेल जठै कठै ई टूटै, कविता रो अँकांगी होय जावण

रो खतरो ई बध जावै । सबद छिणी ई पोरवा रो आंख सूं मूरत नै घड़ै । भौत जिको अणघड पडघो है, भौत जिको कैंयो नी गयो है, सबद ई तो उण मून नै भागै, अणघड़ नै तरासै । अमूरत नै परगासन वाळो सबद जद हिड़दैं अर मगज रा देळी-दरजा डाक नै अवतरै तो गीत रै उणियारै आपारै सांम्है होवै । गीत जिण मे मानखो जीवै जलमै, गीत जिण सूं समाज जागै । इण खातर जोसीजी कैंवै—‘आवो रे कविया म्हारै साथ रे, जुग नै नूवै गीतां सूं घेरल्या ।’

‘बोल भारमली’ है तो अेक इतियास कया पण इणनै खाली इतियास रो घटनावां रो बखान ई नी कैंय सकां । नी ई इण नै सन-सम्बत रै मतै सतरवी सदी रै राजस्थान इतियास रो अेक घटना ई कैंय सका । भारमली जोसी रै कवि रो ‘नारी’ है अर उण सूं मिळणवाळा पुरुस ई जोसी रा पुरुस पात्र है । बोल भारमली सिस्टी रो धड़त करणवाळी नारी रा सवाला रो काव्य है । वै सवाल जिका भूतकाळ सूं अवार तांई पड़ूतर रो उडोक मे उभा है । नारी अर उणरी मरजाद, पुरुस अर उणरा करतब, इण रै ओळें-दोळें ई इण काव्य रो कथा पूरी नी होय जावै । भारमली रा सगळा बँवहार रै पछै जिकी भारमली पाठक रै मन मे जलमै वा जोसी रो ‘राधा’ है, ‘भारमली’ है, ‘जयसी’ है, नै कवि रो सर्वांग मानवीय स्त्री पात्र है । जोसी रो फगत इण अेक पंगत मे नारी रो मानवीकरण होय जावै कैं—‘थे दूजी कुदरत हो विधाता रो, पैली कुदरत रो खामियां पूरी करणवाळी ।’

‘गणेश’ महाभारत रै पात्र भीष्म माथे काव्य है, पण ‘राधा’ अर ‘बोल भारमली’ रै जगूई नर-नारी सम्बन्धा रो पडताल ई इण काव्य रो अभीष्ट है । कवि साहित्यकार समाज विग्यानी ई होया करै है । जन विरोधी संस्कृति, सड़ी व्यवस्था रो प्रतिकार ई उणरो लक्ष्य होवै । समाज में नर अर नारी दोय समतिथा रै जगू होवै पण नारी रै साथे लगोतार माड़ो बरताव कियो जावणो अेक मोटी सगति रो अवमानना है—जिणरो परिणाम महाभारत रै रूप मे मांम्है आवै । महाभारत में भारतीय समाज रै विकास अर बदलाव रा खोज ई साथै । कविता रो मनोभूमि ई समाज रो मांषली अर बारली सत्तावां सूं न्यारी नी होवै-उण मे कथ्या जावणवाळा आला भाव समाज रो स्पर्तिपा नै ई पड़बिब करै । नर-नारी रै सनमन रो कथा महाभारत, विग्यान रै इण जुग पूगतां ई कितरी प्रासंगिक है, ओ बतावणो ई मूळ ध्येय रैमो है जोसीजी रो-न कैं महाभारत रा अवांतर प्रसंगा नै फगत रास देवणा । मरती बँळा गणेश मात सत्ता रो सिवरण करै, ओ सिवरण ई वां रो नारी रो घटनी मरजाद रो अवाट पिछताबो होवै ।

तकनीकी जुग अर मिनखां रें सनमन रो काव्य है 'आगत-अणागत'—यांत्रिकता रें खोड़ में मिनख जेडो संवेदनसीळ प्राणी गमतो जाय रेंयो है। मिनख री आंतरिक पिछाण, उणरो सौंदर्य बोध, आपोपरी रो लगाव, दीठ-मोठ रो फरक, स्सो कीं बढळ जावैला तो कांई मिनख फगत अडवै ज्यूं होयने रेंय जावैला ? इणरें चलतें समाजू संस्थावा दूटती ई जावैला तो उणरो छेकडली परिणति कांई होवैला ? अँडी ई चितांवा इण काव्य में दीठीगत होवै। मिनख इण भौतिक दौड़ (जिकी जरूरी होवै पण उणरो अणूतो अटावरोपण मिनख नें खंडित ई करै) में भाजतो उपधग्यो होवै अर अमूंझ'र विसाई खावण सारू कवै। 'छिण अेक घरती नें थामो—थामो म्हन उतरणो है।'

'आहूतिया' आपरी तरें रो अेक निरवाळो काव्य है। राजस्थानी में प्रकृति, प्रगति, भगति, नीति निरा ई काव्य लिखीज्या पण 'सम्बोधनात्मक' सैली में लिख्योड़ी अे कवितावां किणी ई भासा में अेक अदभुत प्रयोग है। कवि समतामई संसार सारू प्रकृति अर समाज सूं आपसी गनो राखणवाळी हरेक चीज, हरेक भावना रो आब्हान करै। कवि री चेतना सूं ओ ई प्रगासीज के सौंदर्य मिनख री चेतना सूं अळगो होय जावैला तो उणरो अरथ कांई रेंय जावैला ? मिनख सूं जुड़या ई भौतिक सौंदर्य—मोला में बढळै। मिनख रा कारज अर उणरें सौंदर्य बोध में गैरो रिस्तो होवै। इण सातर ई तो कवि चराचर नें आहूत करै अर कवै-आवो, 'इण ब्रह्मांड में सिरजां देव सिमटी रा जुग !'

प्रेम, भगति, आराधण री कवितावां रो ई दूजो काव्य है 'पुजापो'। प्रेम में निर्वैयक्ति री भावना, भगति में लोकमंगळ री भावना होवै तो कविता 'मतर' री ओपमा पावै। इण आराधण में रिसी रें सैजोड़ ई होवै कवि। वैदिक सूत्रां रो रहस ई महज ममझ में आवै। वाणी रें इण निराकार साच नें कविता, मतर, सम्मोहन चावै ज्यूं अभिहित करो, उणरो मूळ लक्ष्य तो अेक ई होवै—लोक कल्याण री भावना। जोसी रो सनेसो इण बात सारू के विनास री परिवरितियां नें फगत प्रेम सूं ई टावी जा सकै—अठै ओ सनेसो घणो समीचीन प्रतीत होवै। संसार अवार जिण स्थितियां सूं खबरू होय रेंयो है ये कितरी घातक है—इणरी कल्पना कवि जेडो जुगद्रस्टा नीं करैला तो कुण करैला।

सत्यप्रकाश जोमी रो मृत्यांकन आपां राजस्थानी रें ऊजळें भविस रें रूप में कर सका हां। राजस्थानी कविता रें इण विराट कवि रें स्वास्थ्य री मंगळकामना करां।

काई इण विग्यान रा जमाना में मिनख रो
 अंत होयगयो ? काई विग्यान मिनख रो देह
 सूं उणरो काळजो काढ लियो अर उणरी
 भावना रो बिणास कर दियो; जिण सूं कै
 आज मिनख रै वास्तै कविता रो को दरकार
 कोनी । काई मिनख रै जीवण सूं आज दुख,
 दरद, हरख, नेह, उछाव, आणंद, क्लेश,
 संताप अर मोह-परीत इत्याद भावनावां लोप
 होयगी; जिको आज कविता रो जमानो
 कोनी । हर जमाना रो मिनख आपरै सारू
 जमाना रै भारफ्त ई कविता निरमाण किया
 करै ।

राधा

1960

पैलापैल

पून पालकी में बैठचा
 मुरली रा झीणा सुर
 म्हारा नांव नै
 कूट-कूट में गावै
 कण-कण रा कानां में गुजावै,
 जमना री लैरां म्हारा नांव नै कळकळावै,
 ठेट समदर री छोळांलग पुगावै,
 रूखां रै पानडां रा होठ
 म्हारा नांव नै गुणगुणावै
 कोयल नै सुणावै

पण पैलापैल
 सुगणी जसोदा रा जाया !
 थूं म्हारो नांव पूछियो;
 लजवंती लाज
 म्हनै दुलेवडी कर म्हाखी
 दो आखरां रो भोळो-ढाळो नाव
 म्हारै सूखतै कंठां रै
 पोयण में भंवरां ज्यूं अटकियो,
 म्हारै होठां री लिछमण-रेखा में
 वैण जानकी दाझण लागी

थूं म्हनै घणी-घणी चातां पूछी
 पण सुगणी जसोदा रा जाया !
 म्हारै मुरंगै गालां रै कमूमल म्हेला सू
 लजवंती राणी
 नी उतरी मो नी उतरी

आज अणचितारचां
अणबुलाई, अणचीती सी
अलेखूं वार
दौड-दौड आजं थारै दुवार
तो ई नी अछैही आस पूरै
नीं सवाई साध पूरै
रे म्हारा कांन्ह कांमणगारा !

पण पैलापैल
अचपळा कांन्ह कंवर !
थू म्हारो अवोट पुणचो पकड
मुरंगी जमनां रै कांठै
उण कदंव हंख रै पसवाडै
म्हारै नैणां में टुग-टुग जोवण लागो,
थारै कोडीलै हाथ रो
निवायो परस
म्हारै हं-हं में
झणकारां रा झाला मारण लागो
रगत नाडियां में
जाणै पाळो जमग्यो;
आखै पंथ, आखै मारग,
पगां में भाखर रो भार लियां
घणी दोरी चाली

आज थारै-म्हारै परसेवा में
कोई भेद कोनी,
माठ कोनी,
थनै म्हारी पलकां सूं
वाव दुळाजं
तो म्हारो पसीनो तो आप ई सूग जावै

पण पैलापैल
हेम रै उनमान
धारा ठाटा दरस सूं

म्हारा पसीना में जाणै आदण लाग्यो
 थू पीतांवर सू
 म्हने बाव करतो ई गियो
 अर म्हारो पसीनो
 नैणां-नैणां, पलकां-पलकां
 अर हं-हं सू
 उफणतो ई गियो

आज जमना रै सगळै कांकड
 डाढी रै माथै
 मुळकती मिमजरियां
 जाणै म्हारी मांग रो चितराम

पण पैलापैल
 म्हारी मांग सजावण नै
 अमर सुहाग रै खातर
 थू मिमजरियां रा मोती लायो,
 तद म्है छळगारी लाज रै फरमांण,
 माथो ऊंचो कर लीनो;
 डांडी-डांडी मिमजरियां रळगी,
 कांकड़-कांकड़ मोती रळग्या

आज अंवर रा लिलाड माथै
 चळापळ तारां री
 अणगिण दीकियां
 पळपळावै, चमचमावै, मुळकै

पण पैलापैल
 जद थू म्हारै आंटीलै भंवारा बीच
 रतनाळै हीगळू री
 टीकी देवण लाग्यो
 तो म्है छळगारी लाज रै फरमांण
 माथो नीचो कर लीनो
 म्हारी मुरंगी मेंहदी रै उणियार

वदनामी

छानै क्यूँ मिळू
म्हारा कान्हू छानै क्यूँ मिळूं ?

थारी मुरली
म्हारा ई तो नांव नै
घरती आभै में सरसावै;
वरस जुगां री छेली माठ लग पुगावै;
कुण नी मानै ?
कुण नी जाणै ?
तो छानै क्यूँ मिळू
म्हारा कान्हू छानै क्यूँ मिळूं ?

नगरी-नगरी, हाट-हाट, गल्ली-गल्ली
लोग म्हनै जाणै,
थारी-म्हारी सूरत पिछाणै
अेक जीव रा अे दो इदका रूप
कुण राधा, कुण गोपाळ !

ओ जमना रो नीर अथाग
थारा नै म्हारा भेळा भाग
रंखा रा सगळा पान थनै जाणै,
म्हनै हर फूल हर कळी पिछाणै,
तो छानै क्यूँ मिळूं
म्हारा कान्हू छानै क्यूँ मिळूं ?

यो आभो घरती नै चूमै
ये जमनां री लैरां सागर सू लूमै

મો પૂન જન્મ થા જાના મે
 મોન થા મોના મોન મનામે,
 મો પુન્ય મોરખ જે મમખે
 ખાવયા ખાવોયા ખાવ ને
 ખર્ચે માન મુ મુનામે,
 મે ખાવયા પુન્ય જે જાના મે
 ખાવયા મોન થા મોન મુનમુનામે
 મે મમલા મારે-મારે દુઝ જેન થા મ મ બનેવ,
 મારે-મારે મોન થા મોન થા માવ બનેવ,
 મારે મોન મુને અમાર કરે
 મારે મોન મુને પુન્ય કરે

મો છાને થયુ મિટ્ટ
 મારા જાન છાને થયુ મિટ્ટ જે

ब्याव

नी कान्ह ! नी
थारो-म्हारो ब्याव कोनी हो सकै !

म्है विरज री अक गूजरी
थारी जान री किण विध खातरी कर सूं !
दायजो कठा सूं ला सूं !
जणा-जणा रो मन किण विध राख सूं !
सासरा नै कियां केवट सूं !
नो कान्ह नी
थारो-म्हारो ब्याव कोनी हो सकै !

दूर देस रा राजम्हैलां में
कोई राजकंवरी
सपनां रो संसार सजाती
थारी माग उडीकती होसी
थारा चितराम कोर-कोर
दूतियां नै दिखाती होसी;
कामण करती होसी

थारा राज सूं
मोटा सिरदारां री जान
आगलै गढां पूगसी,
साम्हेळो जुड़सी
डेरा लागसी
नगर री ऊंची हवेलियां रै
झरोखां सूं
कामणियां फूल गेरसी

नारायण की गोश
 भव मोहना की लतावाली के बीच
 धूँ जिनकी छट है
 गायन बाधनी
 सा बाधन के माता देव में पड़ी
 कोई मादनी
 गुरु-गुरु बोहर की माटी मू
 दिया मेमो,
 अर मुद-मुद
 भावना पर-दुवार में
 माध-मग में,
 मटो-मवाद में
 दिवापट, बाग में
 मया में, देवा में, पूजा में
 मूवा में, बोधन में, भवना में
 ललललललल भावना
 देवता-देवता जगदी ही जगती ।

भी बान्त ! नी
 धारी-भारी ध्याव कीनी ही गर !
 केई देमां रें टपका राजधिया की
 भटापट भरी मभा में
 राज में गियटपोही,
 हिरणी-मी दरपोही,
 कोई बड़भावन
 धारें हायां हरन करवा की
 कामना करती होंगी
 आंखी रें येम
 यनूळिया रें भंवर में
 धूँ उषने उछा लामो
 परणवा रा कोडीला पूजा पतमाह
 आपरी मांग गुमता देग,
 रोस अर अपमान की ताळी सदयदता,

थारै लारै
 अजेज वार चढसी,
 पण थू आपरै आपां रै पांण
 पूनगत रथ माथै हाकां-घाकां
 उण कंवारी नै
 थारै रंग म्हैला ला विठासी

नी कान्ह ! नी
 थारो म्हारो व्याव कोनी हो सकै !

वीनणी तो जीतणी पड़ै
 गऊ-सी किणी किन्या नै
 जीतवा सारू
 केई राजा भेळा होया होसी
 सै आप आपरै
 भुजदंडां रो वळ आंकसी
 कोई धनख तोड़णो पड़सी,
 कै कोई निसाण साधणो पड़सी,
 कै वळै कोई अणहोणी करणी होसी

थारी भुजावां रो वळ
 कंवारी किन्या रै
 घरवाळा रो प्रण पूरो करसी;
 अणजाण किन्या
 अणजाण सूरवीर र गळा में
 वरमाळा पूरसी;
 पुरोहित मंत्र उचारसी,
 कड़ूबो मंगळ गावसी,
 मावड़-वावल हरख रा गीत गवासी,
 खुसियां रा ढोल बजासी;
 छेला मौरत ताई
 हारघोड़ा मनहीणा राजा
 घमसाण मचावसी
 वानै भरपूर हरायां

थनै म्हारो अंस वणायो,
 थारा दुख में दुख जाण्यो,
 थारा सुख नै सुख मान्यो;
 थारी रीस आदरी,
 थारै मनावण रूसणा करचा;
 घणी रींभी, घणी खीजी;
 थारै जीवण री
 थारै वधण री
 कामना करी ।

थने रेकारो देती-देती
 अवै 'नाथ' कियों पुकारूं ?
 नी कांह ! नी
 थारो-म्हारो व्याव कोनी हो सकूं !
 ओ तो थारो थारा सू
 नै म्हारो म्हारा सू व्याव हो जासी ।

बिदा

आज थूं मथरा जावै
 भला ई जा,
 म्है कद रोक्कूं ।

थारै मंगळ पंथ रो अपसुगन कहूं कोनी,
 थारा दुपटा नै खेंच-खेंच फाड़ूं कोनी,
 निस्चै जाण,
 हाथां रै लूम-लूम थारो चन्नण उतारूं कोनी
 सनेसो भेजण री उतावळ कहूं कोनी

आज थूं मथरा जावै
 अंतर कुंज में चाल,

धरं रा पून माई ह,
 मुपनी रा
 मायन भिमरी माई ह,
 धाननी रा
 हनी-भोटी रो मिरावन वर है
 धार मल्लु निवक स्याऊ,
 जमना रं नीर रो बेवहो उग्रमा
 धारे माधनी भाऊ,
 धु मुमन मनालने
 मुऊ म मुमन मनाऊ,
 बेवे ती मुमनधिनी वन जाऊ,
 वम वम धारे मुमन स्याऊ
 धारे गिनी पति है
 मुमनी रं नूपरा धाप म
 मुमन रं मोनी टाक म,
 माछा मे विरगिनी मोन म,
 जठे-जठे धारे वम रा निमान है
 उठे-उठे हर्मिमार रा पून पर म,
 भेवमो है वृजा मे वमनी वर म
 मदी मदी वनल वर म,
 धारी देह धारे
 जठे-जठे धारे हाथा रा निमान है
 उठे-उठे बेगर वनन नमान म
 धु मधरा गिनी
 तो धारी प्रीत मे
 धारी मायन वना राग म ।

जुष

मन रा मोत कांछा रे—
 धर-धर मूं भाजी आई गोपियां

जमना रै काठै रमल्यां राम,
नटवर नागर,
अकर वजादै थारी वांसरी

मन रा मीत कांन्हा रे—
पिचरंग घाघरिया घेर घुमेर,
ओढण ताराळी वोरंग चूनड़ी
वांया मे वाजूवंद री लूंम,
पगल्यां में वाध्या विछिया वाजणा
आभा मे पूनम केरो चाद,
आकळ उडीकै थारी गोपियां

मन रा मीत कांन्हा रे—
मिमजरियां भरदै वांरी मांग,
हाथां रचादै मेंहदी राचणी,
मुळभादै उळइया कंवळा केस
फूलां सजादै वेणी नागणी,
अतस में भरदै गैरो हेत,
नैणां मे भरदै सुरता सांवळी

मन रा मीत कांन्हा रे—
गोयर सूं काळी घेन उछेर,
गोहै उडीकै साथी गवाळिया
मटकी भर माखण लीजै चोर,
मावड़ नै देस्यां मीठा ओळमा
पिणघट—पिणघट गागर दीजै फोड़,
रस में भीजैला कोई गोरड़ी
लुक जास्यां कंवळां केरी आड़,
थारै मनावण करस्यां रुसणा
आवैली सावणियां री तीज
झूला घलादचां वेगो आवजै

मन रा मीत कांन्हा रे—
नवी मुणी रै म्है आ बात,

रोजी तो पायी पायी कुण मे
 कुण ते मंग घुटे पडात,
 मग मुलीने मेला मजदना
 मकर मे उदरी दीमे मेत,
 पाऊल तो पावला पाय पुन-मा
 लगी भुदरा ये पणम पाव,
 पदा पामरे पादे मेन ये
 सोडले-मी माता केरी पाव,
 पावा पनमा ये मोगा मोगा
 मिनल उर तुम ते कुमार,
 पन्नी पुरे ते मकर मजपदे

मन ये मीन वागता ये—
 कुण पाय दोनन कुण ते मीन,
 मना मोचन वर पायी भुदरी !
 पावण वर नमिया ते नदियाळ,
 लोडपा पोतावर वर ते मोडना !
 मीन नचावण वर मिण्याण,
 मीन वर उगारणा मीन पाय ये !
 मुग्गी ते पडले कर कोरले,
 विरमी ये माळा आमी वर परी !

मन ये मीन वागता ये —
 जग मे ते मंडणी पममाण, तो
 भाई वर भाई करमी नार
 आपम मे मटमी मग्गी, मानगी
 पटला फोटेना काळा ओड,
 अमर मुलागण पारी मोपिया
 कामनिया विरमी चीन वजार,
 कुण तो उगडी येना ते टांगी
 विरमी पुरमा म होमी हीन,
 दावर कहामी विना वाप ये
 कुण करमी धोवडिया ये व्याव,
 कुण तो कटूया वारी पाळमी !

अणगिण माचडियां देसी हाय,
मुडजा, फौजां नै पाछी मोडलै

मन रा भीत कान्हा रे—
जग मे जे मंडग्यो घमसांण, तो
कुण तो बणासी सतग्वड म्हेल,
कुण तो चिणासी मैडी-माळिया !
कुण तो उगेरै मीठा गीत,
कुण तो वांचैला पोथी पांनड़ा !
कुण करसी गोखडिया मे जोत,
कुण तो माडैला आगण माडणा !
कुण तो मनावै वार-तिवार,
कुण तो तुळछा गवरां नै पूजसी !
अणपूज्या सात्यू सिभ्ग्या देव,
कुण तो करसी रे मिंदर आरती !
मिटता जीवण री थनै आंण,
मुडजा, फौजां नै पाछी मोडलै

मन रा भीत कान्हा रे—
जग में जे मंडग्यो घमसांण, तो
कोयल कुरळासी वागां मांय,
नाचता थमसी वन में मोरिया
चीलां मडरासी हरियै खेत,
गीधण भंवैला सगळै देस पर
डाकणियां रमसी रात्यूं रास,
चौसठ जोगणियां खप्पर पूरसी
घरती माता रो लागै स्नाप,
मुडजा, फौजां नै पाछी मोडलै


मन रा भीत कान्हा रे—
जग में जे मंडग्यो घमसांण, तो
भातो ले भंवसी रे भतवार,
हाळी जद लड़वा जासी खेत में
हळ री हळवांणी वणसी सैल,

मुहरी मुहरी में लीपिया बाइमों
 मुहरी में मोरी में निवाण,
 मोरी में दावण मोरी में मे
 बामेवण देमी धने पाऊ,
 मुहरी, मोरी में दासी मोहने

मन रा मोह बाग्या रे -
 जल में छे महराई धमकाण, मो
 जलना में मोरी में मोह,
 मोरी में बाग्या बाग्या मोहिया
 मोरी में बाग्या बाग्या मुह,
 मुहरी मुहरी धने धने भाइमों
 धनेधने बाग्या मोहरी मोह,
 जलल बाग्या मोरी मोहिया
 धने धने धनेधने मो बाग्या,
 मुहरी, मोरी में दासी मोहने

मन रा मोह बाग्या रे -
 बाग्या रे मुहरी मोहिया बाग्या,
 मुहरी, मोरी में दासी मोहने
 मोहिया-बाग्या मुहरी मोहिया,
 मुहरी, मोरी में दासी मोहने
 बाग्या मोरी में धने धने बाग्या,
 मुहरी, मोरी में दासी मोहने
 बाग्या रे धनेधने धनेधने बाग्या,
 मुहरी, मोरी में दासी मोहने
 बाग्या रे धनेधने धनेधने बाग्या,
 मुहरी, मुहरी मोरी में मोहने

□



दीवा कांपै क्यूं

1962

- गीता रो जग ● सोवन गाछो ● जागण रो गीत
- जीवन रा होवा

गोतां रो जस

थाळी तो वाजी ऊंचै डागळै
रैणादै जायो सोनल भाण रे
कोई मा टसकै ऊंडी ओवरी

आखै कडू बै हरख वधावणा
कुण तो गावै मावड़ री पीड़ रे
सिरजण रे सुख रा कुण दै गीतड़ा

अजमो रंधावै रतन रसोवड़ै
पीळां रे वांधै बांदरवाळ रे
सासूजी सात्या देवै वारणै

हांचळ तो खोळै नणदां लाडली
जेठांणी देवै पाटो ढाळ रे
पड़दा बंधावै गवरू सायवा

जोसीजी वांचै टेवो टीपणो
आई वेमाता मांडण लेख रे
मीठी गीतेरण काढै घूंघटा

मावड रै नैणां कविता जीवती
जायोड़ा जुग पुरसा रे जोग रे
कुण तो लिखमी जलमां रा गीतड़ा

वागां तो आई भोळी वायली
मिळवा नै छांनै मन रै मीत रे
गोतां बिन कियां जोवै वाटड़ी

भावेनो मोटी मोटी प्रीति
माया में भेटी मन में मध
बाधा में मनी जाने देवटी

मुग तो दूताई गुन में आगम
कोई विभिये हूँ गीत में
मन में बाधा में गाय गुनारो

अहमी तो विजयी गाय में
मन मारी मोय विमल में हूँ
कोई भाविलन बरिया भगवा

पानों में पदायो अलखोमना
कोई मनायो पतर मुखाय में
गीता विन कोनी मुकुट वामनी

मोरी विजयारे गीत महेनिय
मोटी रवाये मोटा गीत में
गीता विन कोनी महे मादना

गीता विन विद्या पदों धोपदी
गायें बनदा बनदी रा कोट में
मोटी पदाये कोई गीतदा

तोरण तो आसों रादयर गावली
बनदी धुप विदकोत्या में हूँ
कामन मोळें तो मोळें गीतदा

पैयें ई करे धमगी सादनी
मुग ममरी विदता रा गिलोऊ में
पंवररी रा बाचा गाचा गीतदा

मोटी कोयलदी बानी गायरे
आंगू रो गीतां गायें मेळ में
करदे विदाई गीता गीतदा

फूलां री सेजां सिवटी घूघटे
संकाळू डरती नूवें सुहाग रे
घनडा सूं सेधी होवें बीनणी

धीरज बंधावो वाई सासरें
कोई तो मावो अमर सुहाग रे
गीतां बधावो वारी प्रीतड़ी

कुण तो छिपावें साधां अरगणी
छानें ओलें री ज्यांरें पेट रे
गीतां में गावें बंस बधावणो

कान्हूडो झूलें सोवन पालणें
मावड वयू बैठें मुडो भीच रे
हिवडा सूं छळकें भोळी लोरियां

प्रीत तो लगाई, वाई पीपळी
चाल्या कमाऊ जद परदेस रे
ऊंची चढ जोवें बिरहण वाटड़ी

नेणां रा आसू पूछें गीतडा
गीतां सूं घटसी काळी रेंण रे
गीतां सूं ओछा दिवस बिछोह रा

गीतां रा भेजो कोई वादळा
ढाढी मुणावें धण रा गीत रे
गीता री कुरजां हाथ सनेसडा

गीतां रे समचें चालें सासवां
भाई बैनां रा गाढा हेत रे
गीतां में देवर नणदां लाडली

कुण तो व्यायण नें देवें सोठणा
कियां जंवाई जीमै थाळ रे
गीतां विन कुण तो सगपण सांचवें

बिखरण तो लागी बंधी ब्रुहारियां
गीतां सूं रोपो कुळ री काण रे
गीतां बिन कुटुम कवीला तूटसी

सूनो वळै रे दीयो आंगणै
गीतां बिन तूठै कोनी देव रे
गीतां नै उडीकै मिंदर आरती

गीतां में तुळछां गवरां पूजणी
तीरथ बरता रा साचा नेम रे
नूवै गीता बिन टळिया जावसी

भगवां तो धारचा साधू मातमा
गीतां बिन कोठै आतम ग्यांन रे
नूवै घरमां रा नूवा गीतड़ा

मिट ज्यासी इतियासां रा पानड़ा
वीरत कीरत रै जस री देह रे
गीतां में जुग-जुग ताई जीवसी

गीतां बुलाई आई वादळी
आसूदी धरती रो अळसोट रे
गीतां बिन कियां होवै हळसोतियो

गीतां रा काढो खेतां ऊमरा
गावो तेजा री तीखी ढाळ रे
गीतां सूं भर लेवो बीजोळियो

गीतां बिन धूजै कूवै कीलियो
पांणतियो धूजै धोरां नीर रे
गीतां बिन दोरी रात रुखाळणी

नूवी तो भणतां गावै वायला
गीतां बिन कोनी होवै ल्हास रे
गीतां सूं ऊंची आवै पूजळी

गीता बिन मीयाळा नै काटणो
गीतां बिन कैहड़ा कंथ वसंत रे
गीता बिन कैहड़ो सावण भादवो

गीतइला गावै भीणो वायरो
गीता सूं ऊगै सूरज-चांद रे
गीता बिन रितुवा फिरणो छोडसी

गीता बिन कोनी नदिया खळखळै
गीतां बिन कोनी ऊगै फूल रे
गीतां बिन कोनी दीवा जगमगै

गीता बिना प्रीतां तो रुळियारगी
गीतां बिना जाया पूत कपूत रे
गीता बिन परणी घाटा लांधसी

गीता मे जलमै जीवै मानखा
गीतां मे जागै सवळ समाज रे
गीतां में आखा जुग नै जीवणो

पग-पग तो जीवण मार्ग गीतइ
आवो रे कवियां म्हारै साथ रे
जुग नै नूवै गीतां सूं घेरल्या ।

सोवन माछळी

सांभ तो पड़ी नै वड़ग्यो नीर में बैरी
आ थारी मछवा बाण कुवांण
छीळां सूं टाळै गिण गिण माछळी

क्यूं थूं हिवोळै ऊडा समंद ने रे मछवा
क्यूं थूं पसारै भीणा जाल
खारा समंदां री खारी माछळी

पाछो तो वावड़ थारी झूपड़ी रे मछवा
थारी थाळी मे चांनण चौक
तड़फा तोड़ रे सोवन माछळी

सात्यू समंदा नै राखै नेणा मांयनै रे मछवा
होठा विच साचा मोती सात
मीठा पांणी री सोवन माछळी

कैवै तो चीर कवळो काळजो रे मछवा
माथै भुरकाऊ तीखो लूण
काटां विना री सोवन माछळी

तेल में तळू रे थारै रांम रसोड़ मछवा
नीचै सिळगाऊ मधरी आच
छिण छिण सीझै रे सोवन माछली

धोया-धोया थाळां पुरसू आधी रै अमलां मछवा
अलंध भरोखै जोवू वाट
अंग तो मरोड़ै सोवन माछळी

मुंडो अँठण ढळती रा काई आवै रे मछवा
पैला ई क्यूं नीं लेवै चाख
जतनां सू राधी सोवन माछळी

कैवै तो वेचा सोवन माछळी रे मछवा
वेचनै चिणावां अंचा म्हैल
छोडा समंदा में पाछी माछळी ।

जागण रो गीत

मीच आखड़ियां, कर अघारो
मत अंधारो सहो

जागता रहो
 ताकता रहो
 जागता रहो
 सपनां रो राजा चंदरमा, इमरत पी मर जासी
 सोना री जागीरा खोकर सँ तारा घर जासी
 छिण मे उठसी रैणादे रा काळा पड़दा
 चन्नाणा री किरणां सू ठगणी छियां डर जासी
 नवी जोत मे राख भरोसो
 नवी कहाणियां कहो
 जागता रहो

सीटी रो सरणाटो वाजै, मील मजूरी चालां
 खेतां में पंछीड़ा बोलै, हल रा ठाट संभाळां
 हाट हटड़ियां खोलां, दिन री बाळद आई
 मैंगत भूखी रहै न कालै, इसो जमानो पाळां
 ऊगै है सोना रो सूरज
 मत आळस में बहो
 जागता रहो ।

जीवन रा दीया

मारग रा दीया रे
 थोची थळियां रा ऊजड़ पंथ
 चांदो तो छिपग्यो, किरत्यां डल रही
 डरतो उगेरै तीखो गीत
 चालै थकाळू डांडी अकलो
 सिझ्या रा जाया ! थारो हेत
 बामो तो छोटो सगळी रात रो
 भिन्नमिलतो दोसरे उजाम
 जोत नै मिळार्ज पीळा भोर सू

मेड़ी रा दीया रे
 कोई संचायो तेल चंपेल
 वाटां वटाई पीळै चीर री
 सजिया रे सिझ्या रा सिणगार
 गोखै संजोयो थारो चानणो
 काली रे काजळिया री रेख
 थारै सरीसी गोरी देहड़ी
 वळजै रे जद लग जोवै वाट
 वधजै जद पीया आवै सेज में

मिंदर रा दीया रे
 गूंगी पड़ी रे ज्ञाभ मंजीर
 सूनी परकमा, सूनी आंगणो
 देवां री पूजा थारै हाथ
 रातीजोगा री थारी बोलवा
 भगतां नै मिळियोड़ा वरदान
 थू ई भर लीजै थारी खोळ में
 कर लीजै आगोतर री वात
 भाटां रो भरोसो कालै कुण करै

माटी रा दीया रे
 सूरज सू ऊंचो थारो वंस
 मावस रै मोड़ै थू ई जूझियो
 लेखा तो वाचै थारी छांव
 जोगण, बिजोगण, देवी देवता
 मांभल रै जीवण रा सैनाण
 सोई धरती री सांसां कुण गिणै
 बळियां ई जाग्या रैसी प्राण
 बुझियां तो जीवण जासी जीव सू ।

□

‘साहित्य जिका सांच सूं बाधेड़ो करै, वो इतिहास ज्यूं, काळ सापेख कोनी होवै । इण कारण जद कोई काळ रो इतियास, साहित्य मे ऊतरै तो वो अणत-मोला रा पख में होवै, इण कै उण पात्र रा हक मे कोनी होवै । साहित्य घड़ी-घड़ी इतिमास नै आपरी कसौटी मायें जाचै-परखै । इतिमास नी आपरो नजरियो बदळै-नी कयोड़ी बात सूं ज्यादा बता सकै जद कै साहित्य सारू अंडी कोई सीव नी होवै ।’

बोल भारमली

1974

- अपरंच ● रूप ● सावो ● सवाग ● जाळो
- विराग ● अडवाणो ● प्रीत ● आप
- साख राजा मालदेव री ● साख राणी उमादे री ● अंताखरी

अपरंच

म्है कुण हूं ?

प्रीत रा पुस्करजी रै पावन पगोतियै
फागणिया हथेलियां ऊग्योड़ा
लीला जवारा वोळावती गिणगोर ?
कै चांद री इमरत डोलियां रै ऊपरवाड़ी
बरसता मेघां ज्यूं ढळती
माटी री तीतर-पांखी सोरभ झिकोर ?

म्हैं कुण हूं ?

इतियास री खड़ग-लेखणी सूं
रगत-मसी में सीवा बढळता भूगोल रा
अडोळा चितराम री खांडी कोर ?
कै रंगसाळ में चितारियोड़ी
ऊभी आंगळियां सांनी करती
कुळ बहुवां रै डावर नैणा झरती
भाटा री नागी पूतळी रा लेवड़ा री लोर ?

म्है कुण हूं ?

तोड ज्यू उछेरी म्हनें घोरा जैसलमेर
झेकाई बाळू रेत
घड़ री साख बाधी
सिणगारी सोनलियै गिरवांण
गोरबंध कवडाळां;
नीरो नागरबेल,
तो ई बाजती नळियां
बिछटगी झोरू मू
कतारियां रै देगतां-देगता !

पाळिया वासक म्है
 मनड़ा रै रोहिणी दुमां
 रचन-कचोळां ईसका पय पायो
 डाढां डसायो कंवलो काळजो
 बिस री गहळ बितायो
 रांमतिया-रमतो वाळापण

सूघती चंपा री चौथी पांखड़ी
 पूगी बागां मडोवर रै
 चरती आफूनी रा फूल हिरणी ज्यू
 सोई मेहूड़ा री छांव
 गुळवयारां फाळ सांध्या
 इमरत कर पीवी म्है
 रविजळ री छळ-छौळां !

बदळो चुकायो यूं
 अणजाण्या मावीतां रै पाप रो,
 धुतकारां, ओझाड़ां, संताप रो,
 अणसभता हाचळ चूंध्या दूध,
 फाटै गावां री
 गाठ घुली निरधनता,
 हटक रै होड़ां दियै जेवन रो,
 रोक-टोक रमता रूप रो,
 वचपण रो,
 मेहणा री बोली रो,
 नारी निबळी रो
 गोली रो

जेवन रै कामरूप वादळां री रीभ
 टहूकी जेधांजे टेकरियां लाल सिहरां,
 मोर ज्यूं पांखां रा छतर तांण !
 पण देख पगां साम्ही
 ढळकाया आंसूड़ा
 कोट-कोट, कांगरै-कांगरै

तनवन राज कियो जोवन सादूलां
 सरवर री पाळ
 मदगहली गजगांमण सू करी चूक
 कुभ नै विदार गजमोती निया काढ
 मान कियो धणियाणी,
 मांणी तो राज-सेज मौजां बस म्हें मांणी

हिंगळू ढोलिया रै वादळ पथरणे
 जठै-जठै म्हें फेरिया पसवाड़ा
 उठै-उठै विगसिया फूल
 रातराणी. चपा, गुलाब रा
 अर सपना रै ममदर-तकिये
 जठै-जठै ओसरिया मोती नीरद-नैणां
 उठै-उठै भरग्या
 पीछोला, वाळसमंद, आनासागर !

तरणापे अंतेवर अकमाळा
 भीमळ-नयण मारग नीहाळती
 प्रीत री पुरवाई रा सदेस री
 कुरळाई गत-पखी कुरभड़ ज्यू
 'तिरसी हू, तिरसी हू'
 सेवट उडगी सरवर रै ईरां-तीरा
 जोड़ी सू जुड़ण
 मनड़ा रै कोटड़े

गेली वण भावन रची भाटिया री
 राणी वण रंग दियो राठीड़ां
 झोरावा गाया कोटड़िया रा
 संपूरण नारी ज्यू

म्है कुण हूं ?
 जिणरै कू-कू पगल्यां री खोज
 'खोज गई' गाळ खाय
 ओठै-ओठै हालती कुळबहुवां
 सतियां के राणियां !

प्रीत री कामधेण म्है तो
समाज रै मीट-मारग
(मुईदार ज्यू)
टणमण टोकरा वजावती
आगै निकळगी छांग रै
टळगी म्है टोळी सूं

म्हने टोळण आया 'आसाजी'
दूवा सोरठा गीतां कवितां रै टिचकारै
पण म्है वधतीगी
खेतां-खेतां, सरवरां-पोखरां,
वागां-वगीचां, चरणोयां
थळां-मरुथळां

म्हैं कुण हूं ?
बाघाजी रो जस-अपजस
हिवाळां ऊंचो, ऊंडो महराणां ?
कविता कोटड़िया री
अरथां, संकेतां, सबदां परवारी ?
परोकी प्रीत ?
नेह गाढा मारु री ?
बिना हाथ हथळेवो ?
गांठ बिना गंठजोड़ो ?
बिन सावा परण्योड़ी ?
जलमी कठै, पाळी कुण
किणरो म्है घर मांड्यो
सती हुई किण साथै
आडी ज्यू समाज री

म्हैं कुण हूं ?
सरीरां असरीरी ?
नाम जात कुळ बिहूणी
क्रौंच पांखी आद कवि री ?

चंडाळी ?
 खंडाळी
 रूप री वणजारण
 वडारण जोवन री ?
 आदण ईसका रो
 रेख के ह्याळी री
 लीक सू टळियोड़ी
 उछाळो दवियोड़ी भाटी रो ?

घ्याव मुरसत नै, सिमर गणपत जद
 मांडोला छंदा-अछंदां
 सवदा में बाधोला प्रीत री कथा कोई
 वरणोला नारी नै
 थे ई बतावोला पीढियां नै
 'कुण हूं म्हे,
 भासा रा भावी कविसरां !

रूप

जद रतन तळाई रै
 आडा टेढा पड़दा बंधाय,
 भोलण जावती राजकंवरी
 सहैल्यां रै झूलरै
 म्है उतारती निवसण सगळा सू पैला
 अर पाणी रा दरपण में
 निहाळती म्हारी रूप
 मैला गाभा सू मुगत
 म्है अक देही जात
 जद ढोळती म्हारै अपधन रो
 रूप कूपळो निरमळ नीर
 घुळ जावती म्हारी कू कू पगथळियां जळ मे,

ससहर ज्यूं पळकती
 म्हारै मुखड़ा रो पड़छाया
 अर तिरती छौळां माथै
 म्हारी मुळक हंस री पांख ज्यूं !

पण ओझाड़ा खाय
 निकळणो पड़तो नाडी रै वारै
 अर घूजतै डीलां पैरणी पड़ती
 कंवरी री उत्तरचोड़ी पोसाकां !
 उमंगतै अंगां काटती खड़पां
 कांचळी फाट्योड़ा टूकिया
 विना अंतरसेवै कळियां रो घाघरो
 अर बदरंग लूघड़ी !

अणसमभ म्है वूझती रोजीना
 थूं म्हारै डील क्यू आयो
 हे कामणगारा रूप !
 थारै ओपतो सिणगार कठा सूं लाऊं
 च्यार दिनां रा पावणा !

सावो

जद सूं नारेळ झेलियो
 मालदेवजी
 राजकंवरी रो सुभाव की बदळतो लागै
 आजकाल ना भरै सेजां भेळी
 ना करावै म्हने मरदानो भेख
 अणमणी रैवै आखो दिन !

गुमेज री की बात ?
 राठौड़ां नै भाटियां री डीकरियां रो
 सदा सूं ई चाव !

पछै जोघाणै रो धणी
 पग पसारै अजमेर तांई
 चोखो बचायो जैसलमेर
 गोध री अणियाळी भीट सूं
 गढ सू परणीजतो गढ !
 राज सू फेरा राज रा !

धसमस धोया जैसांणगढ रा
 पीळा जाळी झरोखा,
 सिणगारघा कोट कांगरा !
 ठाकरां उमरावा रो थट्ट गरणायै
 बुरजां, म्हैलां, माळियां !
 घुरीजती नीवत अर सरणाई रै सुरां समचै
 टाळी म्हनै दायजै देवण
 डावडी ज्यूं
 हाथी, घोड़ा, करहला, बळदां,
 सोना-रूपा, हीरा-पन्नां,
 गाभां—पोसाकां
 रथ अर पालकी साथै

दूह दड़ादड़ ! दूह दड़ादड़ !
 सुणीजै नगरां री धोक
 राठीड़ां री चढती जान री
 कळहळ रो सरणाटो गढ रा चौक में
 ब्याव रै उभावै
 राग रंग में रीझतो रजवाडो
 बुरजां में बतळावै सूरमा सैणां सूं
 जनानी डोढ़ी गीतां रै बायरै
 सिणगारै वाजोट विराजी वीनणी नै
 सौरभ सूं गरणायै आंगणै

केसरिया कसूंमल रै दळ वादळ
 सोधै भारमली अेक उणियारो
 जिको उवारी उणनै अेक रात

समद म्हैल में
अर अेक ई निजर में
करदो अनुरागण पौरूस री !

पखार लेवती अेक वार
उण अणजाण्या पौरूस रा कू कू चरण !
समरपण रा पुसव भर आंचळ
उतार लेवती आरती देवता री
अर नैणां में सावळ झांक
घर देवती उण मन में
म्हारै हीया री हेमांणी
विदा होवण सू पैलां !

सवाग

अजमेर आयां कित्ता दिन होयग्या
अेक वार ई कोनी दिख्यो परणेत
दीख्यो ई होवै कुण जाणै
नाम नाम सुण्यो है कानां
अेक-दूजा नै ओळखां कोनी !

तो ई सुख है परणीज्योड़ी वाजण में
कोई री होवण में

तीज पौर आयग्यो बीड़ो अनदाता रो
पानां री छाव
पोसाकां, गैणां, अंतरदान
केसर कस्तूरी
मिठाई री छावां

महै खुद डोढी सूं लाई वीड़ो
अर राणी उमादे भटियाणी रो
सवाग विड़दावती
थाळ में घलाई पच्चीस मोहरा ।

राणी जी नै अंगोळी कराई
सौरभ री दपटां
दीवा जुपाया गोखै-गोखै
आळै-आळै चढाया पूजा रा पुसव
नख सिख सिणगारण लागी
चत्तर डावड़ियां !

हाल मोत्यां री लड़ाई कोनी
गूंथी ही चोटी रै
कै पधारग्या पिण्डा महैला में !
धूजगी कंवरी रै हाथ री आरसी
हळफळायगी अवरी डावड़ियां
आंचै-आंचै सारण लागी काजळ
अर बिगाड़ण लागी
रळियामणो सिणगार !

महै पूगी रंगमहैलां
आधो घूघटो खेंच
सेजां रा सिणगार अनदाता नै
मुजरो अरज करती
घड़ी—अधघड़ी विलमायां राखण ।

म्हारै बिछिया रै घूघरां रै
खणका री अगवाणी
लड़थड़ता अनदाता
भरली महै भुजावां में ।
अर म्हारै वोल्यां पैली ढंक दो
म्हारी अधरज आपरै होठां सूं

समझी कोनी
उतरतै सोळवै सईका रै चेत री चवदस
अेकाअेक वणता इतियास नै
डरगी
इण अचीत्या अणाहूत सू
आहेड़ी सांम्है हिरणी ज्यू ।

प्रथीनाथ,
जिकां री दुधारां लचकै
सूरां री खेटक ।
धूजै मारवाड़, नागौर, सोजत
अर अजमेर री गिरद,
भीचै वरजोरी
कादम्बरी री गहळ
दायजै आई अेक डावड़ी नै !
भारमली नट कोनी सकी
झूठ मत बोल भारमली !

जद सैलां रो सांवत,
नरपत,
पड़वै रा आरण में चढ़ाय लिया
पंचसायक कंदरप ज्यूं म्हारै सांम्ही
मोह भूरछा रै पांण
म्है ई वणगी छळगारी
समोवड़ करण नै !

धुपता लाग्या म्हनें
म्हारा सम्बोधन, विसेसण
बदळतो करता, बदळती क्रियावां !

मांग में घालै जिणरो सिंदूर !
बदळा री रात दूजी वार कोनी आवै !
म्है राणी क्यूं कोनी वण सकूं ?

वस, म्है ई चाख लियो दुवारो
 अर नटती नटती, माथो हिलावती
 पलकां नै तिरछी तणाय
 लूमगी नरनाह रै
 संपूरण अंगां, संपूरण संगं
 अंगरळी रै पैलै सवाद में !

कुण जाणें कद आई उमादे
 अर ठोकर सूं गुडायगी पीळजोतां !
 लाल किंवाडी रो खुडको ई कोनी सुणीज्यो
 दिन ऊगां फगत लाध्या
 धरती पड़ी म्हारी कांचळी रै लाग्योडा
 भटियाणी जी रै काजळ टीकी रा
 पूंछ्योडा अहनाण !
 कुडाळी वण आंगणै ढळव्योडा
 म्हारा घाघरा माथै
 ठोकर रा सळ ।
 भीतां माथै चिपियोडी गालियां ।
 मोडै ढळव्योडा आंसू
 अर चौबारै बिखरघोडी
 चूड़ियां, बीटियां, रिमभोळां,
 करणफूल, बोर अर वाजूबंद ।
 म्है दूजै दिन जागी ।

जाळो

सुणियो अेक दिन
 कवराजा ईसरदासजी सूं बंतळ करता
 अनदाता नै हर आयगी
 राणी उमादे भटियाणी री ।

‘कविराजा, देखू थांरी सुरसत रो परताप
मनाय तावो राणी नै
रुसणो भंगावो ।’

पैलीवार चेती म्है
धारणा रो मोह-धरती सू—
कोई खांमी है इण राजा रै मरद रूप में ।
इचरज होयो म्हनै
परण्योड़ी लुगाई रुठगी इण आदमी रो ?
हथलेवा रो दाग ई दाग लाग्यो
इण वींद रै ?
वीनणी भींटीजी ई कोनी इणरा अंगां सू ?
हैं.....?
घरवासो कोनी होयो इण निरभाग्या रो ?

अर ओ मरद भेजै
अेक कवि नै, आपरी परण्योड़ी मनावण ?
दो प्रेमियां रै बिचालै
हेत रो मून ई जद रचदे
सौ सौ त्रिकूटबंध,
अर अेक-अेक सबद रो उच्चारण
वण जावै सुपंखड़ी, सावभड़ी, भंदाक्राता,
पछै हेत रै सिवाय किसी कविता
मांगै रुसणो अेक मानेतण रो ।
म्हारी जाण में
प्रेमी ई होया करै कवि कालीदास

सुण्यो कदैई कोई ढोलो
अेक तीजा पुरुस नै भेजै
आपरी मरवण मनावण नै ?

क्यूं कोनी ओ पुरुस
भाल आपरी प्राणप्यारी रा रेसमिया कुतल
कर दै अचोट चंदरमुख आभा सांम्ही

अर उणरा दरपण-नैणा मे नैण घाल
 कर दै नेह रो वो संकेत
 जिकां सू दामणी सी चमक जावै
 नारी रो रूआळी रूआळी
 अर मुग्ध होयोड़ी वा
 नट जावै, नटिया जावै, नटती ई जावै ।

धरती रो भार धारण वाली
 अे भुजावां क्यूं कोनी बांध सकै
 आपरी तिरिया रो पुसव काया ?
 कोई खांमी है इण राजा रै नरापण में ।

अर आखा नारी लोक में
 म्है भारमली ही लाधी भागहीण,
 जिकी सोयगी इण अणवर साथै ?

जिका भरद नै नैडो कोनी आवण दियो
 कोई लुगाई आपरा रूप मंडळ रै
 उणनै जीत, अंजसै भारमल ?
 इत्तो पत्तन म्हारो ?

समभक्तां ई परसेवो फूटग्यो म्हारै अंगां
 अपूठी होय पूछ लिया
 म्है अडवड़ता आंसू
 भागी म्हैला में दरपण रै रूबरू,
 काळी छियां-सी पसरगी
 नैणां रै हेठै ।
 अवरोही जीवन रै पिणघट
 ढळग्या कुच-कळस
 चामड़ी लटकती-सी लागी
 भुजावां रो

सुण्यो ईसरदासजी भंगाय दियो रूसणो
 मांन छोड़ अठवाळी बिराजगी राणी
 जोधपुर आवण नै ।

म्है बघारघा नाळेर देवी रै ।
 नाचण लागी अणूता मोदी में ।
 गुमेज है म्हनै
 अक आंटीलो, लोही तिरसो,
 नारी मन री साधां सू अणजाण मरद
 म्हारै कारण रखी तो करी दूजी नारी री ।

पलकां सूं ब्रुहारघोड़ी सेज री
 अनग-रज में लुटघोड़ी काया
 अक अणघड़ नर री
 फुरण तो लागी नेह रै नगरां ।

म्है खाद ज्यूं तो रखी
 अक पुसव रै बिगसाव में ।
 अकारथ कोनी होई म्हारी गीत संगीत वारणी
 अंग मरोड़णो कांचळियां उतारणो ।

म्है जाणू, म्हैं कोनी लियो जलम
 कोई राजा रै घरै ।
 कोनी जलमी कोई राणी री कूख ।
 पाछो म्हारी कूख जलम्यो
 कोनी बणैला राजा ।
 पण पछतावो कोनी म्हारा नाम जात
 कुळ बिहूणा जलम माथै
 मत वणो भलां ई राज कंवरां री मां
 म्है अक सम्पूरण नारी तो वणगी ।

कै आया समाचार कोसाना सूं
 पाछी फिरगी राणी री पालकी ।
 आसाजी वारहठ कैयो बतावै दूहो
 मान अर पीव रै दो दो गयन्दा रै
 अकै कंवूठाण बंधण रो ।

घणी रीस आई वारहठजी माथ
 पांणी फेर दियो वै म्हारी साघना रै
 म्हनै उवारण री हूस में ।
 सांचाणी गैला होवै दोनूं—कवि अर प्रेमी ।

विराग

आरण सूं बावड़ता जोधारां रो
 जद उतारूं आरतो,
 झटकू पोसाकां चढी खंख,
 अर घोवू चाठा लाग्योड़ा कड़ियाळ ।
 यू लागै जाणै म्है पूंछूं
 न्हारा, बघेरां रींछां री
 लप-लप करती जीभां ।

सूरां रै कपाळ प्रहार करता सुभट
 काई सांचाणी भूल जावै
 म्हारो फूलां गूथ्यो सीस,
 आपरै खांधै टिकियोड़ो
 सिक्षा रा सिद्धरी पळका में ?
 भड़ां रै उरांट सैलां रा धमोड़ा मारता
 काई वै पांतर जावै
 आपरै भुजअंतर भिड़ता
 म्हारा पयोधरां नै ?

संघार कियोड़ा वीरां रै पेट सूं
 जद निकळै अंत्रावळियां
 कांई वानै कोनी रळी आवै
 म्हारी नाभी कनै ऊगी रोमलता री ?

खागां सूं न्हावणिया म्हारा राज,
 कदेई तो कोनी करी मनसा

म्हनें छाती सूं लगाय
बरसता मेह में भीजण री ।

अर जद जद म्हारा इमरत परस सूं
वोली में मद घोळ
अरज करूं जंक लेवण री
वै म्हनें निवसण कर देवै
डावड़ियां रै देखतां देखतां
अर जिनावर ज्यू मिटाय लेवै
आपरी भूख रीसां बळता ।

मरण कोडियाळ, कद समझै
सूछम भोग रो सुरगाळो मरम ।

अडवाणो

तिरस रा अंक पड़ाव सूं
दूजै पड़ाव ।

जैसलमेर आयगी हूं म्हारै पीवर
कोई ठपेको कोनी दियो
बाइसा साथै चूक करण री ।
मालदेवजी री अंक सोवणी सूं ई
धूजता लागै केई गढ कोट ।
वैजयंती ज्यूं फरकूं म्है
देसां रै व्योमाळ
मनां रै देवळ ।
कोई सांम्ही मींट कोनी करै

आपरै अंकां कोनी उठाई
मालदेवजी म्हनें ऊमा रै भरम ।

मान दियो वै अेक अणखी रूप नै ।
 छानै कोनी राखी आपरी प्रीत
 अर छळ कोनी कियो भोग सूं ।
 ओछो तुलम्यो वो म्हारी ताकड़ी
 भोग रा संपूरण अरथां में ।
 कोनी भोग सकियो नित नई जीत्योड़ी-धरती
 कोनी रिंभाय सकियो भारमली सिवाय
 कोई अवर नारी ।
 अधूरो वीर, अधूरो भूपत ।
 आधो पुरुस, आधो भंवरो ॥

दूजी कांनी म्हैं भारमली ।
 जठीनै मोड दियो आपरो अंग वाहण
 जठीनै संधाण कियो जोवन रो पुहप घनख,
 जठीनै वाही रूप री खागां
 वाजतै ढोलां जीत लिया मनां रा गढ़
 घराधार करदी जूझारां री अखोणियां ।
 संपूरण भोग सूं ओछो
 न लियो, न दियो ।

अर ओ अलवेलो राजकंवर ?
 अेक कापुरुस ।
 रगत री झूठी सौरभ रै कळंक रा
 मसाणिया हेला रो चाठो
 कठै आयगी म्है ?

जांणै पावासर रो हंस
 मोती चुगण उतरम्यो ओछै नाडै
 जांणै मरु में भटक्योड़ो किस्तूरी-मिरग
 पूगम्यो करदम सरोवर ।
 हाल क्यांरा कोनी पूग्यो नीर
 रळक्यो कोनी घोरां
 लागै अडवाणो कियो है पांणतियो ।

प्रीत

रूप री अेक पीड़ है
रसैला घावां सूं ऊंडी
राग रा सुरां सूं तीखी
अकथ अर अरूपी !
रीक्षणहार री मीट में होवै उणरो जलम
अर रसिया री निजर सूं
हेठै पड़तां ई
अकाळ मर जावै वो !
रूप री ऊमर कोनी आवै !

नीतर जिकी डावड़ी रो रैण-सिणगार करतां
म्है देख्या वाधाजी नै—
गाल रै तिल लगावतां,
वेणी में फूलां रो चोसरो टांकतां,
टीकी में चदरमा कोरतां
पगा में मेहदी रचतां
नखां रै धार देवतां
अर सोरभ में भिजोय भिजोय उणनै
अंग लगावतां
वा मुळगै ई सुन्दर कोनी ही ।

अठीनै म्है,
जिकी अेक निजर में उछेर दूं
हजारां करहलां री झोकां
चिट्ठूड़ी रै अघर संकेतां डुवाय दूं
आडां ज्यू समदर तिरती
अलेखां खेवणियां,
अेक मुळक मे छुडाय दूं
भूपाळा रा मुगट-सिंघासण
लारला कित्ता दिनां सूं
घेर-धुमेर घाघरा रा फटकारा देवती

फिहं बाघाजी रै पढ़वै
 पण कोनी मिलै रीझ रो आऊकार !
 जित्ती धार अँकायत मे
 अँकला मिलण री चेस्टा करी म्है
 म्हनै लाधा वै जुगल रूप में
 अर टळता गया
 म्हारै मिलण रा मोहरत !

कद देऊं इण अरजण-पुरुस रा
 सीम नँ छाती रा भूघरां बीच विसाई ?
 आखा ससहर आनन माथै झेलूं
 अधर पारळ रा दासता घाव ?
 अर अँकां में कसती-कसीजती
 हो जाऊं इण लोक सू अंतरधाण ?

बाघाजी रा आऊकार बिना
 मरगी राम जाणै संसार री कित्ती भामणियां
 तिरसी, झुरती, अण बोली !
 अँजसै भारमली रो लुगाई पणो
 म्हनै टाळो वै टोळी सूं !

म्हैं ई अनग रै भरोसै ठगीजी
 कित्ता अँगां सूं !
 लोगां जाण्यो भारमली माल्है
 जोधपुर, अजमेर, जैसलमेर रै राजम्हैलां
 अर म्हैं, महादेव रै चढावण जोगा
 आकडोडियां सू पूज्यां गई
 सतमासिया मरद, अधूरा प्रेमी
 चोर अर लतिया !

बाघाजी सोधली आपरी कल्पना
 टहूकती मगरां मगरां
 अर अँक भटकतो अरध मंडळ
 भिळग्यो दूजा अरध मंडळ सूं
 संपूरण मंडळ रो आकार धारण करण नै !

बाघो म्हारो भव भव रो भरतार !
 उतारी कोनी आवरू अँठवाड़ी जाण
 समझ लियो मरम पीळ पीळ चढण रो
 पिणघट पिणघट नीर भरण रो,
 गळी-गळी रास रमण रो
 बिना वतायां !

बाघो म्हारो भव-भव रो भरतार !
 जिकां री छूँ कोनी परणेत
 जिकां रो खोसै कोनी कोई धरती
 जिकां री अणत भोग्या हूँ म्हँ, न पैली न छेली !

बाघो म्हारो भव-भव रो भरतार !
 जिकां री आसुरी भुजावां में
 कसण दूँ म्हारी बीजळ-काया !
 उघाड़ूँ घड़ी घड़ी ठंकण नै,
 मूँछां रै लगायां राखूँ होठां री पांसड़ी
 अर रगत रा उछाळा ढाळचां जाऊं
 झव-झव करता अंक में !

बाघो म्हारो भव-भव रो भरतार
 जिको अरय दियो म्हारा जीवण नै,
 रगत नै रंग देय
 रूप नै सिखायो संगीत
 अर कविता दी अरूप प्राणां नै !

बाघो म्हारो भव-भव रो भरतार !
 भोग नै बदळ दियो भगती में
 ध्यान घर अरचना करी
 देवां री आरती ज्युं
 जोत जगाई देह रै देवरै !
 बाघो म्हारो भव-भव रो भरतार !

म्हारी बात करती करती म्है
 क्यू करण लागगी आपरी बात ?
 सुर क्यू बदळग्या म्हारी कथणी रा ?

आप सू सनमन होयां
 दीठ बदळगी है म्हारी !
 मरू रै कण कण म्हने नाचती दीसै निरजरियां
 कांमलतावां लूमी है कलपद्रुमां रै;
 रंग-झड़ लागी है, रजरमता अणगिणत फूलां में

मीठी लागै आपरी दियोड़ी पीड़
 होठां माथै हरिया घाव दांतां रा
 नखां छिदियोड़ा उरंग
 अर केवड़ा रो चुभियोड़ी कांटो
 अपधन रै रेसमिया पाट-पल्लै !

लावो आपरो सीस
 म्हारी छाती माथै टिकाय
 गीतां सूं थेपड़ दू पलकां !
 लावो होठां सूं होठ उलझाय
 आपां फूंकदां प्राण, पिंजरां में !

हां, कसलो
 कसलो आपरी बली भुजावां में
 म्हारो इकलेवड़ो बीजळ गात !
 मालदेवजी रा भेज्या
 आया आसाजी बारहठ म्हने पाछी ले जावण
 आयगी होवैला ओळूं राजा नै
 अर आपरी कुवाण रै पांण
 वहीर कर दिया होवैला कबीसर

छंद नै भांग
कविता रो अक चरण पाछो लावण नै !

जाणूं हूं
छायालोक में सपनां रो संसार रचावणिया
कवीसरां री सिद्धवाचा रो परताप !
अर जाणू हूं
कवि सू ऊंडी समझ कोनी होवै
कोई में कविता री ;
देही रै डाळां, कांम रै तिणकलां सू
अक वसेरा रो सिरजण
म्हारो जीवण-काव्य !
गुणो, कवीसर ! गुणो !

काठी चिपगी म्है बाघाजी रै
गळा में घाल हाथ
अरघ चंद्राकार लूमगी
भुज अंतर टिकाय म्हारो सीस
सुरसरी ज्यू वणगी तरळ
नैण मूंद अंगेज लिया देवाधिदेव नै !

आसाजी रै च्याहंमेर घूमण लाग्यो ब्रह्माण्ड
राधा अर स्याम री जुगत छिव
भब्र भब्र करण लागी नैणां में !
अर कल्पना सिरजण लागी रूप—

भूल सगळा मनोरथ,
आसाजी करली डंडोत इण विराट दरसन नै
आसण री आसका चढायली माथै
अर नीक्षर ज्यू खळकण लाग्या
वांणी रा वरदान—

नमो सैळ कैळास सिखरा, महेसर
नमो अरध-अंगी, सती-गोरजा वर

नमो जोग जोगाण, करतळ गरळ घर
 नमो मार मारण सुरसरी सीस, ईसर
 नमो अंकलिगी, भूतेस-कायः
 नमो सिवायः नमो सिवायः

नमो मोहिनी रै भुवन रूप रोंझळ
 नमो भुजउंचायां सती देह निहचळ
 नमो जळमअंतर उमा रा वरणवर
 नमो उरधलिगी, जटाधर सुधाकर

नमो परमगुर, अणत, विस्वनायः
 नमो सिवायः नमो सिवायः

साख राजा मालदेव री

म्है भांगिया नित नया खितिज
 नित नया भुरजाळ ।
 जठै जठै वजाई रूक
 रणमल्लां रा मुडां सू पाट दी मेदनी;
 अर अजेय म्हारी कटक
 लारला दस वरसां में जीत लिया तेतीस मुलक

रण रो रसियो म्है
 म्हारै पराक्रम, विपख जोवै
 आपरै पराभव री वाट !
 साधारण समझ नै पांतरग्यो
 'सेजां रै समर कोई पख हारै कोनी'
 खड़ग सू कोनी मरै अनंग
 सैलां सू विधै कोनी !
 कळा है कामण नै जीतणो !

सोधतो कोनी म्हें, गमियां थनै !
मरियां, कोनी करतो पछतावो
पण थूं म्हारा पुरसारथ री उतार पांण
वर लियो अेक कवि नै ।
तोखडी बोर जेडा कोटडा रा
धाडायत वाघा नै ?

भारमली हरायदी म्हनै
मेहणी लगाय दियो म्हारा पुरसारथ रै
अे व्रणां री औखद कठै ?

अबै तो राणी ई कोनी चढैला
म्हारी पौळ
धरती ढवैला कोनी म्हारा सूं
अर कळंक लागैला म्हारा जस रै
विगतां में !

गुण गरभा भारमली !
थूं भर देवती म्हारी अपूरणता रा आळा
म्हनै वणावती अेक पूरण नारी रो
पूरण पुरूस !
म्हनें वगसती थारै इमी कूपळा री
अगोचर बूदां !

म्है राजा सूं वण जावतो रंक
भसमी रमाय लेवता !

साख राणी उमादे री

भरोसो हो म्हनै भारमली माथै !
अेक वार तो हुई पीड़

उणनै म्हारी सेज, म्हारा ई धणी सूं
रळो रमतां देख !
पण जाणती म्है,
भारमली सेवट सोधैला आपरो भरतार !

म्है लुगायां,
सूप दै, जिकां रा माइत, अक अणजाण पुरुस नै
बांध दै गंठजोड़ा
कांपती हथेली धर दै नर रा हाथ में,
गाजां वाजां हजारों गीतां बीच
अगन री साखी, समाज रै सांम्है
सीख लेवां दोरी-सोरी पुरुस सूं करती प्रीत !
तरसा छीकै पड़ी भोग री हांडी नै !
चळू चळू पीवां
अर परसाद ज्यू चढावां माथा रै !

भारमली पोल खोल दी मोटे मरदां री !
फेरा खायोड़ी परणेतों
पूजती परमेसर ज्यू जिकां नै
पण कोनी दे सकती संपूरण देही रो भोग !

म्है ई करली अक भूल !
लोकां चावी होयगी रूठी राणी रा रूप में,
ओळखीजै म्हारो म्हैल
रूठी राणी रा म्हैल रै नांव सूं
बदळ कोनी सकूं
जस-देह सूं निकळ नारी देह में !
महाभारत रा गांगेय ज्यू
म्हने ई जीवणी पड़ी
विरमचारणी री जूण
अक अविचारी निस्चै रो
ढोल बजावण रै कारण !

वरस री अेक अेक रात
 करियां गई कल्पना
 भारमली री रलियां री
 म्हारा घणी साथै !
 अर उणरा पिंड री मारफत
 भोग्यां गई भोग मन ई मन !

म्है छांट राखी मरद रा परसेवा सू
 अर भारमली भोग भोग छितराय मरदां नै
 दोनूं पूगा अेक ई सम साथै
 अेक राग सू, अेक विराग सू,
 'नारी बणावै सो नर'

अंताखरी

अंगां रो मेळो भरचां पैली आयगी
 म्है भारमली इण भुवन में !
 कूंकू पगल्यां वसंत री अगवाणी
 फूलां री जाजम विछावण
 चंवर ढोळण मनसिजा री पालकी रै ।

म्हारै सांम्ही पसरचो है
 भावी रो काळ हीण अंतरिच्छ !
 तिरता दीसै म्हनै प्रभंजण में
 अणगिणत नीळज अंगनावां रा आकार
 निरबंध, अणावरत
 कांमासणा लीण,
 ममता विहूणा, अगरभा ;
 सांवळा री गाळ, रागां रीझ्योड़ा !
 पण कुण समझतो
 नारी काया री कमेड़ी री नखराळो मरम
 मरदां रचियोड़ा जुग मे !

कुण समझतो संकेत
 गढ-कोटां-रावळां री
 बीजळसार पीळा लारं जलमत्ता उछाळा रो
 कुण जाणतो
 मिनखा जूण री वेदी रँ ओळं दोळूं
 गोतर फेरा खावता भोग नै
 म्है देह धारण कोनी करती तो !

ससार रा सगळा धन सूं इदको मोल है
 थांरी देही रो, लुगायां !
 'थे दुवार हो सगळी देहां रो !
 थांरी देही बिना कोनी आवै
 कोई आतमा, ईं रळियामणा संसार में !

थे धारण करो गरभ में बेटा
 अर यू ई बिना भेदभाव
 धारण करो गरभ में बेटियां !
 थे गरभ पूरणी मां हो अलेखा मावड़ियां री
 थे जलम देवो डीकरा नै
 जिका जोड़ायत वर्ण जांमणिया रा ।'

थे दूजी कुदरत हो विधाता री
 पैली कुदरत री खांमिया पूरी करणवाळी
 थांरी देही में विलगै
 छोटा अर मोटा-सगळा !

मां ज्यूं सुवाणो जिकां नै छाती माथै
 ढांको आंचळ सूं होठां में हांचळ देवती
 वै जवान होयां उणी भांत मांगै बिसांई
 वल्लभा री छाती माथै
 आंचळ री छीयां !
 न्यारा-न्यारा रुपां में जीवो ।

□

‘नर अर नारी रा संबंध, आदूकाळ सूं दो
 आधारं माथें जुड़या करता । कुदरती अर
 सामाजिक । नर-नारी रा संबंध अबै ई
 सीमावा में सावळ बंधग्या होवें वा बात ई
 कोनी । वेद अर पुराणां रो सैकड़ी कथावां
 इणरा सैकड़ी रूप बखानें तो आज दिन ई
 इण रा अलेखां रूप देखण मे आवै ।

गांगेय

1985

- तलाक री तांत ● बाप रा ध्याव में बेटो बिनायक
- प्रीत रो पराछोत ● फूलां मरां तीरां मरां कोनी
- भां पारी गोद निवाई अे

तलाक री तांत

सात पूता नै समरपित धार में कर
आठवां नै जद उठा चाली
तरगाळी, अपाटा, हसहाळी;
रोक कोनी सक्थो राजा मन कुतूहळ
बूझ बैठ्यो—
ऊजळै चरितां अख्याती ! देव बाळा !
कठै म्हारै रगत री आ वेल,
ओ अवतस थू ओढाळ,
कर निरवंस थारा परम हेताळू,
सनेही सांतनू नै
क्यू कठै कांई करै है
पापनासी, अमर, अविनासी,
तरण-तारण, तरुण गंगे !
प्रिया हे
देव गंगे, वल्लभा हे !

रीझ म्हारी नै दियो थूं वेग, आऊकार,
म्हारी सेज चढगी
म्हनें थारै अचपळै अंगां डुवायो
घेर म्हारी वासना सैपूर देही
पारदरसी नेह थारै !
हाल चितवण उरमियां थारै नयण री
पीवतो ई जा रैयो हूं
अर ज्यू-ज्यू डूब डूबू स्याम रंगां
ऊजळो तर ऊजळो वण, घाट औघट आ रह्यो हूं !

थूं म्हनें ओ भेद भोगां रो वतायो—
काम री झाळां दइयोडा मरद नै

जे कांमणी गंगा सरीखी मिल सकै निस्पाप
तो तन, प्राण, मन होवै अमर
वैता भीर ज्यूं नित निरमळा रे निरमळा !

हे पवीतां में परम पावन !
अमीणी पीढियां रो थूं कठै करदै विसरजण ?
महै करूं हूं जीव वरधापो,
नमन थारो करूं, कर जोड़,
म्हारा रगत रज सिरज्या महोबी वाळका नै बगस,
म्हारा प्राण लेलै
अेक सैनांणी फगत आधा-अधूरा इण पुरुस रो
वाळ म्हारो, पूत म्हारो छोड़ दै
अे माफ कर दै, म्हनें दे दै !
महै थन दीव चढाऊं
फूल चरणां में धरूं, पूजूं, करूं हूं याचना !

घणो राजा गिड़गिड़ायो नेह भीमळ
घणी करली अरचना आंसू भर्या द्विग
लोटग्यो घरती, विसारी कांण-मरजादा पुरुस रो
इमी-घट-मुख सूं कैयो गंगा छळकती—
भूलग्यो भूपत ! दियोड़ा नेह वाचा ?
विगत रो संघांण करणो अेक दूजा रो मना है
जद खिचै दो पिण्ड, ग्रह, नखतां-नखत
आकरसण नियम सूं
नाम ताई जांणणो विरथा
परिचै न सामाजिक लगावां रो अरथ राखें
मिनख रै भोग में
देस जात समाज घरमां रा अदीठ बंधणा सूं
घणी ऊंची ऊरजा होवै
कांम रा कांमण अनळ रो ।

महै करूं काई छिटक सेजां,
फिसळ भुजपास सूं;
क्रोड़ सूं कर सीस आगो,

नेह भरिया अंगदानां सूं विमुए हो
 कांम म्है कांई करूं ?
 अे सवालां रा पडूतर
 कुण होवै थूं मूढ वृक्षणहार, जाणणहार !
 म्है थनै वरज्यो, लिया वाचा,
 मिलण रै, नेह रै पैले दिनां !
 अव असभव है जुड़ावो साथ धारै
 म्है बदळ मारग, खळक जाऊं विपिन-कांनन !
 छुद्र धरती जोग है थू
 छुद्र है घणियाप थारो नारियां माथै,
 सकळ जळ, काळ माथै
 अर भविश्यत रा अगम विकराळ माथै

त्यागती राजा थनै
 म्है पूत राखूला निसाणी रूप में म्हारै कनै
 पाळूला मिनख रो बीज !
 फाटी देह देतां जलम, झेली पीड
 म्हारा अंस नै म्है ई उछेरूला !

तरुण ब्रधतो गयो ज्यूं फूटी रुंआळी
 मूछ, डाढ़ी, गाल, होठां अर छाती
 अंग में चढगी परत स्रम सीकरां री
 लूणिया ही आव, लाली नैण डोरां
 गठीलै आकार भुज, मजबूत पुणचा
 सीस माथै केस लट बांकी
 घणी बांकी नरां री चाल अचपळ !

सातनूं भंवतो नदी रै तीर हृद बेचैन
 जाणै सोधतो खोई जवांनी
 नित रळकता नीर मे !
 मरम विधियोडो,
 घणो ई छीजती,
 निरमद होया गजराज ज्यू !

हालता अणचेत सपनां में चरण ज्यूं
वो विजोगी दरद गंगा रो उठायां ।

देख सर संधाण करता देव जोध जवान नै
अर करतां परस गंगा रै अनंगां
होठ, छाती, गाल, केशां, पेट, कड़ियां
पिडळियां, चरणां, नखां रो
समभग्यो ओ वीर म्हारै वंस रो है
कुण करै दूजो परस
इण हेत सूं म्हारी प्रिया रो !

कैयो गंगा नै विनत लोचण
तज्योड़ो, हारियोड़ो सांतनू जा रूबरू
माफ कर देवी ढिठाई,
माफ कर भूलां
म्हनें थारी दया रो दे भरोसो
हेत रो जाचक
थनै लेवण होयो हाजर
खमा कर
चाल म्हारै साथ थारै सासरै !

कीं नहीं तो अवेजी में सूप म्हारो पूत
म्हारी संपदा रो असल भोगणहार,
म्हारै वंस रो अवतस
जुग नियमां प्रमाणै !
घणो निवळो बापड़ो है मरद
रुच रुच करै रंजण
भोगै भोग
अर संभोग कर, जद फेर पसवाड़ो
बिसर दुनिया, अजाण्यो ऊंध जावै,
मां गरभ में बीज पाळै तीन सौ दिन
सींच लोही सूं घड़ै आकार
खुद रो मांस दैवै
पीड़ भोगै

पण करै परिणांम रो घणियाप सगळा मरद
 पळै भरम, वेटा सू वधैला वंस
 झगडो अंस रो अर वंस रो है !
 क्यूकै मरदां रै रच्योडो अेक निवळ समाज
 धन, परिवार, सत्ता राज री
 है छळ इसो ई !

मां दियो है छोड़ इणरा वाप नै पण
 जनम तो गंगा दियो, गंगा चुंधायो
 पाळियो गंगा जतन सू
 याद राखो
 पूत गंगा रो सदा गांगेय रै ई नांम सू
 रथ धज ऊचायां,
 ओळखीजैला पुजीजैला जगत में

बाप रा व्याव में बेटो बिनायक

भेद री आ वात म्है थांनै वताऊं—
 अेक सौरम चांद में मभरात आवै,
 अर उण सू घणी तीखी
 अेक सौरम सात किरणां में लियां सूरज तपै !
 बीजळी तो पूंजळी होवै सौरम री !
 अेक सौरम होवै जवांनी में चढ्या चंदण वनां री
 फूल री छिण च्यार सौरम
 घणी न्यारी होवै नदी, जळपांत री
 सौरम समद सू !

वस इणी गत
 जिकी सौरम होवै कंवारी देह री
 ओळखै, परखै संध्योडा प्राण
 कांमी लोक में तो गंध ई आकार घर लै !

सांतनू चकरायग्यो इण गंध रा आवेग सूं
 चेतना धिरगी असूंधी अेक सौरम रै समद !
 बिना होड़ै, बिना आगळ,
 वो खिचोडयो ई खिचोडयो
 मइझ पींदै पूगियां दरसण किया जद
 अेक सोनल देह रा गंगा किनारै
 ज्यूं रमण मुक्ताहळां—
 जळपरी कोई बिछड़गी होवै झूलरा सू !

कुण खडी परतख घरा रै केन्द्र में
 थूं मानवी है, दानवी लीला
 के कोई देव कन्या
 भूतणी है संखणी है ?
 सांच है कै फगत सपनो ?
 भूतणी ना संखणी ना देवकन्या,
 दानवी लीला न म्है सपनो अधूरी कामना रो
 धीवड़ी म्है झूपड़ी रा नाथ धीवर री
 नाम म्हारो सतवती है
 संख सीपी और सफरां रो सरळ संसार म्हारो !
 नैण में प्रस्ताव ले पूगो धणी उण झूपड़ा में,
 काढ़ ओळख,
 हाथ मांग्यो सतवती रो
 काम रो आंधी चढचोड़ो !

कीर बोल्यो—
 वापजी बेटी अब्याही
 घरां तो राजेसरां रै ई न सोभै !
 भाग म्हारा,
 खुद धणी इण राज रा, जे मांग करली सतवती री
 ले पधारो !
 पण सुणी म्है
 अेक है युवराज पैली भामणी सूं ।
 आपरै सुरगां गयां पाघां बंधैला सोस उणरै,

राज ई वो ई करैला,
 अर जाया सतवती रा
 जाळ नदिया में बिछा सफरा उडीकत
 मारता भूख
 समद में सीयां मरैला !
 राज रा जे घणी वानै आप मानो
 बंस रो दो गरव
 अर स्वामी वणावो संपदा रो
 तो अरथ है भोग रो इण बाळका सूं
 न्याव होवै संतान रो
 परणेत रो होवै घरम पावन !
 वात अखरी पण खरी ही
 आय ऊभो फेर फेर सवाल वो ई
 म्है लियायो देवव्रत गांगोत नै
 इण राज सारू, भोग संपद रो करण नै
 बंस रो अधिकार दे
 म्हैं खोस लायो अंस मां रो दिखा पौरुस
 सूप चुकियो बेल, रीत परंपरा रो !

आज नट कोनी सकूं हक पूत रो म्हैं
 हर नूवी परणी जलम देवै सपूतां नै
 अगर मांगै घरा, घन, राज रो धणियाप आखो
 जलम रै इतियास रो मुख मोड़ दै कृण
 पूत जेठो तो सदा जेठो रैवैला

नयण नीचा कर, झुका माथो
 थक्या पग म्हैल राजा वावड़यो !
 अन्न खावै ई नी, भावै नीं ।
 आंख लागी हाय कैंडी—
 रात भर आ आंख लागै ई नीं
 मन ओपरो, तन छीज कांटा सो होयो
 गुवराज वूझी दसा,
 वो कारण कढायो—

अर खुद पूछ्यां विना ई वाप नै
सतवती रै झूपड़ै जा चरण परस्या

प्रगट बोल्यो—

मां, मना संकोच छोडो
पूत थारा ई करैला राज, म्है दू वचन सांचा
क्यू कै म्है जामण बिहूणो हूं अधूरो
संपदा रो खेल खेलै वाप
पण मायड़ विना
आ आहुती कोनी म्हने लागै
अरे ओ ग्रास ई म्हारो नी है
फेर ई धीजो नी होवै
सोचता होवो पूत म्हारा राड़ करसी
तो उठा ओ भुज कहूं म्है आ प्रतिग्या
सुणो देवी देवता इण वस रा
घरती, अगन, जळ, चांद, सूरज
म्है जलम भर
हां जलम भर, वस कंवारी ई रहूंला

मुगध माई मां निहाळचो बाळका नै
थूं सभाग्यो है घणो गांगेय
थारै दोय मांवां !
दोय नैणां बीच में थू तिलक जैड़ो
थूं अजेय
अछेह होवैला जीव थारो
थूं जिको छोड़्यो सकळ अधिकार कुळ रो
अकलो थूं ई बचावै वंस
कुळ रिच्छा करैला !

देवता फूला बघायो
सांतनू सरमावतो सो पूत सूं टीको कढायो
पण अणूतो अंक वणाव वणतो रुक न पायो—

आ प्रतिग्या घणी भीखम
 त्याग रो उन्माद है ओ
 भीस्म पड़ग्यो नांम इणरै कारणै
 पण केस होयग्या सेत अणछक सीस रा
 धुंवा ज्युं उडगी जवानी
 होयग्या गांगेय बूढा
 वाप करता घणा बूढा
 अर बूढा ई रैया जीया जठा लग !

प्रीत रो पराछीत

सतवती रै सांतनूं सूं दोय जाया पूत
 पण वधियां विना ई अेक—
 चित्तरांगद
 कठै ई काम आयो राड़ में
 गधख अरि सू
 दूसरो हो विचित वीरज—
 व्याव री चिता हुई डीलां लियां, जिणरी
 बड़ा भाई बहादुर, राजकरता, गंगसुत नै

सुणियो कठै ई राज कासीराज
 रचियो है स्वयंवर
 अपछरा सी आपरी तीनूं कंवारी धीवड़्यां रो
 नाम अंवा, अंबिका, अंबालिका हा

पूगग्या गांगेय ई उण रूप-रण में
 सांतनूं रा भंवर सारू
 वीनणी नै जीत उण सजिया स्वयंवर में
 दिखावण कळा सर-संधाण री

घेर तीनूं राज कन्यावां
 उठा, रय घाल, चाल्या हस्तिनापुर
 जीत रण गांगेय, पौरुस री अथक जैकार सुणता !

अेक राजा, नाम हो सौवाळगढ रो साल्व
फिर्यो आडो,
अरज की—

महै कहूं हूं प्रीत इण अंवा कुमारी सू
महने आ सूप दो वावा
भलां ई पूछलो
आ ई करै है प्रीत म्हासू
जे स्वयंवर होवतो निरविघन
आ करती वरण म्हारो
म्हारा हेत रो तो मान राखो

रीस में अंगार ज्यू वळता
विजय मद गहळ मे गांगेय
करदी अणसुणी आ अरज
उणनै कूट, मरदन मान रो कर
लेय आया हस्तिनापुर रायकंवरी

ब्याव रा फेरा फिरण लागा
करो पाछी अरज अंवा
कहूं म्हैं प्रीत म्हारा साल्व सूं पूरै मनां-ग्यांना
महने परणाय दूजा नै
करो हो पाप; कै है पुत्र ओ नियमां प्रमाणै ?

थे पुजीजो हो जगत में नेम रा निरमाण करतां
थे घडो परिवार, वंस, समाज,
रचना थे कबीलां री करो
नारी नै वरत मरजी मुताविक
थे वतावो—

प्रीत माथै वस किणी रो ?
प्रीत करणो अेक मन रो हक नीं क्यूं ?
पाप क्यूं है प्रीत करणो ?
म्है कहूं हूं प्रीत विसवा बीस
जिणरो संग सोधू,
परस फूलू

दरसणां रींझूं,
 मुगध मन वीजळी जैडो सैचानण
 होवै सदा ओळू, उडीकां !
 थे म्हनै उण सूं छुडा
 क्यू वाध दो हो अेक अणजाण्या मरद सूं ?

खातरी कीकर होवै थानै
 कै म्हैं सेजां रमूला खुलै प्राणां
 हर करूला अंगदानां में नी म्हारै प्रण री ?
 याद कोनी करूला म्हैं अवस म्हारा मीत प्रेमी री ?

वात जंचगी कीं मगज में देवव्रत रै
 खोल कामण डोरडा, गठ जोड़णी
 अर बरी, मोळी
 भेज दी वो साल्व राजा रै कनै
 अंबा कंवारी झूरती नै
 ढोल वाजा, मान आदर सूं, सजा रथ-पालकी

साल्व नटग्यो—
 माजनो म्हारो गंवा, म्हैं होयो हतवीरज
 जिकी रै कारणै, उणनै वरूं ?
 हाथ पकड़्यो हरण करग्यो,
 अेक वो ई वर, कंवारी रो होवै
 माफ कर अवा म्हनै तो माफ कर !

वावड़ी पूठी नूवै वीहार सूं आहत
 समरपित फेर होवण नै हरणकरता कनै
 पण विचितवीरज न थांमी
 कह्यो थारो मन कठै ई और है
 थू और री है—जा अठा सूं !

वाप रो घर छूट्यो
 प्रेमी न राखी
 परणतां वर वीद नै पेली नटी वा

फेर वो नटग्यो
 हरणकरता खण लियोड़ो बिरमचारी रो !
 घणी आहत, घणी ही अकली अवा
 घणा अपमान री दाभी !
 रुळघोड़ी अक पाळा सूं
 खिलाड़ी रै पगां ठुकरीजियोड़ी दूसरे पाळें
 कोई फूलां दड़ी ज्यू !

रीस अवा री नियोजित ही फगत गांगेय माथें
 फूंक सूं ज्यूं नाळ में दे झाळ
 सोनार गळावै लाल गेरू चुपड़ियोड़ा स्वरण नै !

निकळगी अंवा मुलक में
 राजवंसां नै घणी उकसावती
 अन्याव री देती दुहाई
 रीस में खुद होम री ज्यूं झाळ परझळती !
 करै कुण जुध पण गांगेय जैड़ा अनड़ सुभटा सू
 गमावै राज कुण
 इण अक छोरी रा पखा में ऊभ
 खुद री कुण गमावै लाज
 डरतो भीस्म सू
 आखो भुजावळ जीवतो समुदाय औघड़ !

अक दिन चढगी हिंवाळा तप करण नै
 रीस रै फण री बिखम फुणकार
 रा विस सूं डस्योड़ी
 बैर सूं निबळी
 कठण तप री हुतासण में पिघळती !
 साधना सूं रीभग्या संकर महेसर
 कह्यो-कन्या !
 थूं अवस पूरो करैला बैर
 पण इण जलम में नी
 जलम तो दूजो थनै लेणो पड़ैला !

सुण विधाता रै लिख्योड़ा लेख
 वा क्यू देर करती
 बैठगी काठां, मनोवळ सूं जगा अगनी
 उणी छिण भसम होयगी
 प्रीत रो इण भात वा करती पराछीत
 उण पुराणा फिनिख पांखी ज्यू
 जलम लेवण दुवारा, राख वणगी ।

फूलां मरां तोरां मरां कोनी

तो सुणो अरजण, जुधिस्ठर
 क्रिस्ण अर सगळा समरथां !
 जीवतां म्हारै, जठा लग म्है न हारूं
 जीत कोई जुध ई कोनी सकियो
 कोनी सकैला !
 म्है अगर हथियार घर दूं कार्ल रण में
 थे करो आहत भलाई मार न्हाखो
 जुध थारै पख मुडै
 थे विजय रा भागी वणोला !

सस्त्र म्है कोनी उठाऊं
 सांमनै जे जुध मे आवै सिखंडी
 ओ सिखंडी पुरुस कोनी
 ओक नारी है अभागी
 इण जलम री, गत जलम री
 अर पूरव जलम री, फगत नारी !

हेत है म्हारो हिया में नारियां सूं
 म्है न आकरसण नियम सू छिटकियोड़ी
 परस करतां पिड कंवळा
 रोम म्हारो शबज्जबावै
 नाड़ियां तणती म्हन परवस वणावै !

म्है अघूरो मां विना
 तो हूं अपूरण अरध-जोड़ायात विना
 बेटी विना, बैनां विना
 अर प्रीत करती प्रेमिका रै मन विना
 म्हैं टूटियोड़ो हूं
 किणी खंडत होयोड़ी देव प्रतिमा ज्यू
 अपूज्या देवरा में !

हेत हो म्हारो सिखंडी सू जलम रा आंतरां में
 आ, म्हनै छिटकाय
 दूजां री बणी सहभागिणी
 जद अक गण रा लोग म्हानै घेर
 लेग्या अगन, गायां
 अर धारण गरभ करणारी लुगाया !

म्हैं हरण पाछो कियो
 जद आ बणी अंबा
 जलम ले राज कासीराज कन्या !
 यू बदलो चुकायो
 हाथ पकड़्यो म्हैं हरण करतो
 निभातो हाथ रो म्हैं हेत
 पण करली प्रतिग्या घणी पैलां
 म्है कंवारी जलम भर जीवण जिवण री !

आ घणी है भानवाळी, परम मानेतण,
 मरद सू रुसियोड़ी,
 बैर काढण तप कियो
 अर जद मिल्यो वरदान
 दूजा जलम में संहार करसी बेरियां रो
 आ चिता घड भसम बणगी !

मां थारी गोद निवाई अे

मा । गरभ थारै कुडाळी मार सोवै
ज्यू निवाया पथरणा में !
गोद थारी होवै निवाई
जठे अचपळ हाथ पग हातें मुळकता !
देख, मरती वगत कैड़ी वापरै ठारी,
मरण री तळखणा पूग्यो मिनख
चित पडै, सीधो !
आंख में सून्याड असमांनी
निजर असमांन ई असमांन उणनै लील जावै !
जलम सू इधको अवस होवै
मरण में हर जीव
वो मारण न जाणै, भूल जावै !

भीस्म ई चित आयग्या है अणगिणत तीरां !
छिदयोड़ी देह में
ताजा हरचा घावां खिलै है
पीड़ रा रज पुसव, धारण कर नूवा आकार
मारै ठोकरां !
आज गुणसठ दिन हाया रणखेत पड़ियां
आंखियां मिचगी
पलक भारी होई मण-मण
भवा नीचै लटकगी !
बोलणो ई बंद होयग्यो !
चेतना फिर फिर घिरै
पण घणकरो संसार अंधारो लखावै !
छीजता तन मे सळायें ज्यू पुराणा हाडका
अव निजर आवै !
सांस री गत घणी आंची
देह में मावै नी, वस घूम आवै !

भीस्म खोली आंख
 अर संकेत सू वृक्षो—कठं हूं !
 लोग वारं दरसणा आया कह्यो ऊंचै सुरां
 वै आयग्या सूरज मकर में
 उत्तरायण
 हे महाभागी हुकम दो !

भीस्म काढी जीभ
 धीरै-सी सबद 'पाणी' उचारचो
 फेर अरजण कर पराक्रम तीर धरती में पिरोयो
 नीर गंगा रो परम निरमळ
 उछळ आवेग सूं ऊंचो
 अखूटी धार रा टीपा वण्यो
 गागेय रो मुंडो भिजोयो !

भीस्म नै लाग्यो
 कै उणरी वच्छळा मा
 घणै कोडां
 संख-छाती सू टपकतो
 देव चरणाम्रत सरीखो दूध पायो !

मां ! जगत में हेत थारो पारदरसी
 पीड़ थारी अकथ,
 थारो हरख ई अणछेह
 थारै गरभ में धारण करै सै देह सुगनी
 थनै पी पी पळै
 चित्ता टावरां री कर घणी थू हार जावै
 रोग अर भय-भव मिटावण
 टोटका थारा परम विग्यांन
 गोरै गाल थूं काजळ लगावै !

टावरां रो रमण ई थारी रमत
 थूं पकड़ पुणचो प्रथम पग ऊभो करै
 भासा सिखावै !

प्रीत सू संची जुगां सू, पीढियां सू
 राळ देवै है भविष्यत रै अलख प्राणां
 गुणां रा वीज देवै !
 थूं सदा रखवाळती थाती
 धर्ण अपरूप दुरगा, चंडिका अर भगवती,
 बाळका विलसै,
 पळै सै गोद में थारै निवाई !

यू कियो गांगेय सिमरण मात सत्ता रो
 प्रभा वधगी
 उजाळो देह सू निसरै
 करै जैकार वचियोडो जगत वंधियो धरा सू
 जोत अविकारी प्रखर रवि ओष सू
 छिण अेक में जा जोत मिलगी !
 फूल वरस्या, सख वाज्या
 ढोल रै ढळतै धमकै
 प्राण रै प्रस्थान रो उच्छव मनायो !

जद चित्ता नै देह रो सिणगार सूप्यो
 अेक जणा रा प्राण रो कुरळाट फूट्यो
 मोड़ मुडो जद सिखंडी आंख पूंछी
 रोक सिसकी,
 हाथ में ले मूठियो कोई सवागण तोड़ न्हाक्यो
 अर माथो निवा
 ले नारेळ हाथां
 आलतो वो हसगत बळती चित्ता में
 सत करण नै, लीण होयग्यो !

कै अचाणक दोखियो वधतो दिगंतां
 अेक मानव रूप
 अणघड़, चाल खाथो,
 भुज उठायां रोकतो अर नाद करतो
 आ रैयो हो
 साथ आंधो उमड़ती

अर साव लारै खळखळ कर भगवती गंगा
उठावण गोद में छावो
रळकती आ रई है !
घघकती धू धू चिता रै मार छांटो
मंद कर दी
इण कुटम रो जनक वेदव्यास हो वो !

अर गंगा, मात गंगा, मावड़ी गंगा
पतित पावन, तमस हरणी
विमोचन पाप अर भव-ताप करणी,
आपरा जाया अमर गांगेय नै
खांदोळियै पुचकार,
थेपड़ती, करा पंपोळती
दुरगी उठा सूं, नीर गति सूं
करण नै वेदो विसरजित महोदध में ।

□



‘इण तकनीकी सम्पत्ता रा जिका नतीजा निकळें उणमें मिनस री चित्पा मुख्य है। बारस जीवण रा दवावा रें कारण अर वेगवान जीवण केई बेमारियां नें जलम देवें। लोग निरर्ण कोती कर सकें अर पसोपेस में पड़घा रेंवें। इण तकनीकी समाज में ब्यक्तित्व री नुकसान होवें। छँवट मसीना री असर इतो बध जावें के मिनस री कोई कीमत कोती रेंवें। मिनस, समाज सँ छिट्बयोडो अर अलायदो रेंवें।’

आगत-अणागत

1986

- अगवाणी ● ओळख ● उतारो ● मोत ● जांमण नें....
- जांमण नें ● धोयी नें ● घर ● कचरा री कांण
- भूगोल रा बंद

अगवाणी

आगा हो जावो वा'सा
अणसम मारग में क्यूं बैठा हो !
दीसै कोनी, सूरज रो आवै है रथ अठीनै !
चिगदीज जावोला;
कित्ता वेग सू आवै है, देखो देखो,
इण रा आवेगा सू आगती पाखती ऊठणवाळी
आंधी अर बथूळिया में उड़ग्या तो
थै थारी जाणो;
थोड़ी वळा फेर टिकणो-होवै
तो उण धुड़ता ढूढा री भीतां लारै
छींया में बैठ जावो वा'सा,
सूरज रो वेगवान रथ अठीनै इज आवै है ।

वो देखो इंगरेजी बोलतो थारो पड़पोतो
रीस आवै जद हंसण लाग जावै;
वारै बैठा उडीकतां, उणनै सरम कोनी आवै,
जद ना कैवणो होवै, वो हां बोल जावै ।

अर कैडो तो बदळाव आयो—
कै टावर टावर कोनी रह्या;
टावरां ज्यूं रमै है मोटचार;
गरीब गुरवा ज्यूं कारी लाग्योड़ा गाभा परै रईस,
धरम गुरु घड़ी घड़ी परणीजै,
अर जणा जणा कन सोबती धीवड़ियां गरभीजै कोनी !

तो अंकांनी-सिरक जावो सचबोला वा'सा,
चोरी कुण कोनी करै ?
कुण कोनी-छिपावै आपरा करम ?

छल कपट रो ई है ओ महाभारत;
 थानै यूँ ई कोनी दीसै वा'सा
 मिनख रा बदळता मन रो कालायां
 थानै कीकर सूसै !

वो आवै है सूरज रो सतरंगो रथ,
 नया नया औजार अर हथियार
 उठा लिया है मिनख !
 नया नया नसा-पता,
 नागा रैवण नै पैरियोड़ा नया नया गाभा !

वगत रो तो मिटगो सगळी ओळखाण
 रात होयग्या दिन,
 अर दिन होयगी रातां;
 थानै उठाय अक कांनो धरण नै
 कोनी खेला मिनखां रा पवनवेगी यान !

हां बदळग्या'सै कीं बदळग्या
 वगत, अकास, अरथ, धरम, प्रीत, काम,
 ओ धमीड़ो थे कोनी सै सकोला वा'सा
 आगा हो जावो;
 सिरक जावो अक कानी,
 उठी छीयां में जावो परा,
 आवै है हित्यारा सूरज रो निपगो रथ !
 आवै है !

ओळख

अक जमानो हो,
 जद लोगां नै लखावतो कै वै मिनख है
 अर्थ की लखावै कोनी !

अवै फूटरा कोनी लागै फूटरा,
 विडरूप भिरोखां सूं झांकण लागग्यो रूप-सरूप,
 अवै तो पीड़ ई कोनी लखावै,
 दोरो ई सोरो लागै

आगै लागतो, आपां जिनस कोनी हां;
 कोनी हां जिनावर सींग-पूँछ बाळा,
 आपां मिनख हां !

जमानो केई सबक सिखायग्यो
 लुगायां नै लेवता बेचता—
 अर किराया माथै उठावता लोग,
 ना खुद लागै मिनख,
 ना वै लुगायां लागै नारी-रतन !
 गुलाम अर गरीब कमतरिया ई,
 जुड़ाव सू छिटकयोड़ा लागै जिनस जैड़ा,
 अर रोजीना रो इकसार जीवण जीवता
 नींद, जीमण अर भोग-भजन करता
 आपां सगळा ई होयग्या हां जिनावर—
 आदम जिनावर !

अवै ना आपणें कनै हरख-पीड़ है,
 ना भासा,
 आपां नै लखावै ई कोनी कै आपां हां !

उतारो

छिण अेक धरती नै थामो—
 थामो म्हनै उतरणो है

सूरज रा सात्थू धुड़ला तो लारे रैयग्या,
 हांफण लागगी पून अकासां लड़थड़ती,

वेग रूपायत होयग्यो;
 अर गंध जमगी है बादळां ज्यूं
 म्हें जिको फूल मूधतो
 वो तो सौ जोजन लारें रैयग्यो !
 हांफें है सगळा ग्रह नमत्, मंगळ, बुध, गुरु,
 म्हनें अठे कांई करणो है !
 छिण अेक थांमो धरती नै, म्हनें उतरणो है ।

सूरज री अेक किरण नै अठे आवतां
 जित्ता किरौड़ बरस लागै,
 मवद नै उण अगन रा गोळा सू चटक
 म्हारै कांनां लग आवतां
 लागै उण सूं वेसी बरस !
 पछै धारी इण धरती नै—
 अेक पूरी परकमा करतां
 बयूं कोनी लागै बगत री थांण !

देखो, म्हारै लिलाइ पसीनो पळक रह्यो है,
 देखो, फूलगी है सांस म्हारी;
 कांई म्हनें बगत री चालणी सूं छणणो है !
 छिण अेक थांमो धरती नै, म्हनें उतरणो है !

अेक पल तो खावण दो बिसाई,
 सोवण दो म्हनें मोड़ो दिन ऊगां तांई,

बांइटा काढण दो म्हारै पगां रा;
 लारली-आगली सोई तो लेवण दो,
 आंम्है-सांम्है होवण दो म्हनें म्हारै,
 बस ओ ई जीवणो है कांई ?
 ओ तो मरणो है !
 छिण अेक थांमो धरती नै म्हनें उतरणो है ।

मौत

बैठो हूं म्है बीसवां सईका रै उत्तराध
(फगत पनरै बरस बाकी है)
जलम लेवता अणगिण जीवां रै मज्झ
म्हने ई अपरोखी लागै चितणा मौत रो !

पण भिभक आकार धारण करै
म्हारै अवचेतन में रगत री अेक नाडी
जिणमे तिरता अलेखां मरण-कोडियाळ
उण इकथंभिया म्हैल रै कंगूरां कांती
जिण माथै टंगियोड़ो अेक लोही भरतो नरमुंड
जिणरा डोढ़ा शिरोखां सूं छणती
खळखळ हंसी;
अर गोखड़ा में तीरां री सेजां ओझकै
सैलां सूं विधियोड़ा
पळकती करवाळां रै झटकै पड़िया कबंध
कूस माथै लटकता,
अरोगता केसर रा प्याला
अँठता बदन मुगत होवण री पीड़ सूं !

कविता रो छांटो पडतां ई
पाछो बैठतो रगत रो उफाण,
अर गरभ में भेल्लो होयोड़ो भ्रूण
रूप धारण करतो कुंडळाकार !

वसंतायोडा उद्दीपन वन में
फूलां सूं लड़ाझूम बेलडियां बीच
पांच सपूतां रो वाप
काम रा मरण विदु री चेतना में
अेकाकार
जीवण सिरजण री साधना में
अणावरत माद्रो रा भूधर कुचां नै

आपरी मूठी में भींच,
 उणरा निवाया होठां मे गड़ाया गयो दांत
 अर धोवतो आपरी तणियोडी नाड़ी सूं
 किरोड़ा जीवाणु स्वागत करता गरभ में
 अेकाअेक पड़ग्यो निस्पंद !
 निस्पंद होयग्यो हिरणी रो सराप !

रगत री नाडी मे
 कामासणां लीण लाख लाख जुगल
 छिटक छिटक ढंक लिया भोजपत्तर सूं
 आपरा झव झव करता अंग
 गिनोरिया अर सिफलिस री छूत सूं डरियोडा
 मरण रा डर सूं घायल मरियोडा
 अणभोग्या अनुभव री मायावी पीड़
 अेक मीत !

कैंसर वार्ड में
 सूरज भगवान रै उतरायण पूगण नै उडीकतो
 पीड़ सूं छीजतो अेक भरपूर जोधार,
 विधियोड़ी तीरां सूं !
 अंवा नै अेक वार, फगत अेक वार
 निजर रा फोटू-प्लेट माथै उतार
 अंधारा में विलम जावण नै उंतायळो,
 सांम्है ऊभा सिखंडी सूं ई संतोस धार
 जिणरो धीळो माथो लटकग्यो
 जीवता महारधियां रै खवरू !
 अेक बेकाबू रोग
 अेकयूपंचर, अपरेसन, रीसर्च, रीसर्च !

अेनरजी बराबर मास गुणा वेलोसिटी बरग !
 अणु रा गरभ में जलमें
 वा रसायनिक ऊरजा
 जिकां में विसरजण होवै सगळा जीवण !

हिरोसिमा अर नागासाकी रा नगर
 धू धू बळै इण ताप सू
 अर दाझै लाखां पिंड चीसां मारता !
 अक धुवा रा बादळ
 अर घमाका समचै अलोप होवता
 हज्जारां अवोध, निरदोस, जनपद
 चेतनावां निस्पाप !

माथो पकड़ बैठग्या चित्रगुप्त जी
 लाख लाख जीवां रो लेखो
 पाप पुत्र री खतावणी
 मिजमांनी लाख लाख पांवणां री
 पाछा सिरजण री चित्ता !
 नोबल प्राइज
 अंनरजी बराबर मास गुणा वेलोसिटी वरग !

तणाव रा आखर घोखतो
 दपतर सूं घरां बावड़तो
 अक अँलकार भिड़ग्यो समान लदिया ट्रक सूं !
 निकळ आई पेट वारै
 धौळी गुलाबी आतड़िया
 अक घमाका साथै वारै आयग्या
 माथा रा कपासिया
 थरथरायो अक हाड मांस रो वदन
 पांणी, पाणी, पांणी !

सोना री अँठवाड़ी बतीसी धोय
 दान करण नै
 घोखतो ब्रम्हास्त्र चलावण री कळा
 परसरामजी रै सराप !
 चकरिया रै ऊपर धूमती
 माछळी री आख रो संघाण
 नीचै तेल रा कढाय में पढछाया देख !

कंवारी कन्या सूं जायोड़ो
 मां, म्हनै अेक बाप तो दियो होवतो
 बाप बिना बहू कठै ?
 रिच्छा रा कवच-कुडळ कालै ई उतरग्या !
 मुडा माथै मारली अेक डगळ री
 सोना री वत्तीसी धोवण नै
 पांणी, पांणी !

तीन बरस होयग्या बादळां नै अठीनै गाज्या
 सूखगी-धरती रै नीचै री अंतरधारा
 दो मील पूरव कांनी बधै रेगिस्तान
 सालो साल !
 आंधी, बथूळिया अर रेत रा दरियाव
 भरचां जावै सामरथ सतावांन
 रासन में चळू चळू पांणी
 पीवो, धोवो, न्हावो, करो कुरला !

तड़ाछ खाय पड़ग्यो टोगड़ो
 तणगी च्यारू टांगां
 बारै लटकती जीभ माथै बेकळू !
 दिमाग सब सूं पैली मरचा करै
 पछै मरै दिल
 अर आख्यां खासी ताळ मरचां पछै ई जीवै
 ट्रांसप्लान्ट दिल रो
 आंख रो दान संभव है इणी कारण !
 हाल थूक में तरळाई है
 चालो माळवै !

माळवै किसा मिनख कोनी मरै !
 आटा-पाटां बैवती अेक नदी में
 रूखां माथै टिरियोड़ा लोग
 देखता रह्या आख्यां सांम्हीं
 धार में गुड़कता आपरा कुटम नै

डूबता, उतरावता, बदन
नागा, फूल्योड़ा, बिडरूप !

कठा सू आवै रेळो अचाणचक
मरण रो,
बोळाय जावै अवेरियोड़ी संपद,
झूपड़ा !
अर बिखेर जावै घरकोल्या !

वो उड़तो अेक विमाण पड़ग्यो संमदर में
तीन सौ पचास अमीर उमरावां
अर परियां जैड़ी फूटरी
परिचारिकावां नै आपरा गरभ में लियां ।
हाल सोधै है लोग
उण विमाण रो कचरो
जातरिया रो सामान ?

जामण नै

छोरी सू लुगाई बणती बगत रो बदळाव
घणी पीढ़ उपजावै मां
अर थू म्हारी कोई मदद कोनी करै ?

केई तो मिथक, केई तो रहस्य
जुड़घोड़ा होवै इण बदळाव सू ?
सहेल्यां ई सांच कोनी बोलै
अेक बरजणा रो पसराव होवै म्हारै च्यारुंमेर
अेक गुब्बो, अेक अनुमान में जीवां
म्है सगळी धीवड़ियां ?

देही रा आपे आप होवता करम
जिकां माथै जोर कोनी म्हारो

क्यूँ देवै म्हानै अणूँती सरम,
क्यूँ करै म्हारो दरपदमण, अपमान ?

क्यूँ म्हानै अपरस वणावै लोग
क्यूँ म्हानै सूग आवै खुद माथे
क्यूँ म्हानै पाप रो बोध करावै
ओ देही रो धरम
क्यूँ ठेरावै म्हानै कसूरवार
क्यूँ म्हानै चुप रैवणी पड़ै ?

थूं खुद भोगियोड़ी, म्हारी मदद कोनी करै मां ?

जांमण नै

थारा सू विछड़ण रो भौ
म्हने थारा सूं जोड़ दी मां ?
भाई तो जलम सूं ई आपरै पगां होवै
मोटा होयां लाग जावै आपरै बाप रा बीपार बिणज में
संसार वसावै वड़ेरां ज्यू
अर सुख दुख झेलता गुजर जावै इण मेळा सू ?

पण घणी डरती म्है
लारै आंचळ रो छाव छोड़ती,
घणी अचपळ होय जावती
जद थनै कोनी-देखती म्हारै कनै ।

थनै म्हारा डील में उतारण नै ई तो
म्है रमती ठूलियां सू
थेपड़ती, खवाड़ती, सिणगारती, लाड करती ।
थारी जूण जीवन नै ई तो
म्है रसोई करती, घर वणावती, टावर राखती !
म्हनें घणो डर लागतो थारा सू विछड़तां !

सासरै गयां ई ओ संको कोनी छोड़ै म्हारो पल्लो
 धिरियोड़ी नर रा भुजपास में
 आंख मूंद इणी अभरोसा मे चिमक चिमक जाऊं
 कठै ई म्हनै विछड़णो तो कोनी पड़ैला ।
 कठै ई म्है विलग तो कोनी हो जाऊं ।

धीयां नै

हर बार म्है ई म्है हारुं वेटी, म्है ई म्है हारुं ।

थनै जाई जद सुणिया मोसा म्है
 जाणै थारो वेटी होवणो म्हारो कसूर है ।

थनै वेटां सार्थ उछेरी
 तो जणो जणो टोकी म्हनै
 म्हारै पिड रा ई दो खंड,
 सोचो तो कुण वत्तो कुण ओछो ।
 तो ई धोवा धोवा ओळमा घालीज्या म्हारै पल्लै ।

थनै टोकी, बरजी समाज रै संकेतां
 पण मेहणा सुण्या म्है ।
 आगण में थारी विगसती काया सूं डरती,
 थू बारै जावती तो अपलक उडीकती म्है
 अर छपर-पिलंग माथै थारै पौढ़ियां
 रात्यूं चमक चमक पीरा दिया म्है ।

व्यावणसार होई
 तो लोगां आरपार करदो आगळी म्हारै
 नीद उड़गो म्हारी ।

परायें घर विदा कर

अवै म्है सुणूं थारै सासरा री सिकायतां
अर अवखायां थारै मन री ।

थारै कारण हारी समाज सूं
अर अवै हारगी थारा सूं
हर बार, म्है ई म्है हारूं वेटी, म्है ई म्है ।

घर

घरती सूं १४५४ हाथ ऊंचो ऊभो हूं म्है
सिकागो नगर में सीयर टावर री
११० वीं मजल माथै,
जठै इंतजाम है म्हारै रातवासा रो !
फगत बदळग्यो है अकास
अर म्हारी दीठ में उफांण लेवै
सात समंदर पार म्हारो घर
मकराणा मोहल्ला, जोधपुर में
खीर समद में संपिणी ज्यूं अळेटा खावतो !

[म्हां च्यारूं भायां नै बेचणो है ओ दूढो,
लाख लाख रिपिया कोई ओछी रकम कोनी होवै]

अकाअक धारण कर लेवै
मानवी उणियारो, म्हारो घर,
चूना सूं पुतियोड़ो, परेवा जंड़ो ऊजळो !
वाघतो म्हनै आपरी हेताळू भुजावां में
अर बंधतो म्हारी अणसीमा बावा में,
डुसका भरतो,
टप टप चवता आंसुवां में
पाछो लाघ्यां गमियोड़ा टावर ज्यूं !

भाईसा ! ओ कोरो घर ई कोना
 ओ म्हारी रातादेई मां है—मां !
 जिणरी कूख मे जलम लियो म्है
 अेक अंधारा ओरा री टसकती मचली में,
 (सूठ अर अजवांण री सौरम
 हाल भर जावै म्हारी सांस में)
 जठै चौक में चित पड़ियो
 म्है टुग टुग भाळघो असमान !

नया घर में इण घर रो सामान !
 भूगोल सूं बंधियोड़ी कोनी आ सभ्यता
 मोह, कोनी कोई चीज सूं
 अेक बार वापरियां
 अकूरड़ी माथै फेक दै आपरी चीज वस्त
 अै कोनी मानै सरग नरक
 आतमा परमातमा
 अणत काळ अर विपुला प्रियमी ।

कचरा री कांण

और फेको अमीर उमरावां
 पैक करण रा कागद
 आज तो थारो तिवार है
 रंग-विरंगा, फूल-फांटा छपियोड़ा
 चोकणा कागदां सूं बांध बांध
 लावोला अलेखां भेंटां
 अर दिनूगां क्रिसमस रा हंख हेठै बैठ
 सांता क्लॉज रा थैला सूं काढोला
 अेक दूजा रा उपहार
 पछै फाड़ फाड़ फेकोला पारसलां रा कागद

संसार रा साधनहीण देसां रा
लाखां किरौड़ां टावर रैयग्या अणपढ़
कागद कठै
अर है तो मूघा कित्ता ?
कित्ताबां कठै ? कागद कठै ?

फैंको इणी भांत गाभा
दातण करण रा बुरस
हजामत रा पाछणा
मोटरां, घर बार,
फगत अेक बार काम में लियोड़ा सामान
म्हारी दुनिया नै दरकार है अै सगळी चीजां री
दवायां थोक बंध, भलां ई नुकसाण करती होवै
दवायां तो दवायां होवै
अर वै ई परदेसी ।
तो फैंको अमीर उमरावां
थांरी सम्यता नै अहनाण रा कीं छांटा
फैंको फैंको ।

भूगोल रा बंद

अेक जूनी सम्यता रा वारिस आपां
इण नतीजा माथै पूग्या
कै संसार असार है । अेक सराय है
अठै आपरो कीं कोनी
साथै कीं कोनी चालै
कांकरा कांकरा भेळा कर म्हैल चुणाया—
अर मूरख इणन आपरो घर कैवै
ओ तो रैण बसेरो है—रैण बसेरो

पण जद ई मामूली सो दवाव आयो
 आपां नटग्या आपणी जमीन देवण सूं
 टावरां नै पालणें में पढ़ायो—
 इला न देणी आपणी...
 घर रा ढूंढा सारू कोट कचेड़ी चढ़िया
 अर अेक टोडो कं चातरी ई कोनी दी
 भायां नै

पण अवै जलम ले चुकी है
 अेक नूवी सभ्यता
 जिकी ई घरती नै आपरी कोनी मानें
 कोनी मानें देस आपरा
 सैर, गांव, सगळा बदळता चालें
 सीवां सू आगें बधता चालें

आ सभ्यता बदळै मोटर हर दूजें वरस
 हर तीजें वरस घर
 अर आपरो गांव हर पांचवें वरस

घर बदळती बगत कोनी ले जावें ।
 आपरै साथै ।

□

‘म्हें तो म्हारी गरज सूं आह्वान किया है — समता नै सुख-दुख बाटण सारू, काम नै संतान सारू, वेदना नै जागरण खातर, संभावना नै गाढ़ सारू, रीस नै अन्याय रें साम्हें लड़ण सारू, लाज नै हेत सारू, पाप नै सुद्धि सारू....! म्है आं सगळों नै बुलाया है, अम्यरयना करी है, काम मोळाया है अर कदेई-कदेई नतीजा सूं ओळखाण ई कराई है।’

आहूतियां

1986

- वन ● संभावना ● कल्पना ● बाळपण ● भरोसो ● हरस
- पाप-बोध ● स्वाग ● प्रेरणा ● तिरस ● संकोच ● उपज
- सेम ● गाड़ ● ईत्तको ● बस्ती ● न्याय ● आजादी
- प्रार्थना

वन

म्है लियां वरमाळ ऊभी हूं स्वयंवर
थे पधारो सांवळा वन देवता रळियामणा

अं विचारा पांख पंखेरू
करै जिण घर वसेरो-रातबासो
जीव कळझळ करै—
जीवै निपट वळ सूं
सांप, उल्लू, सिंह, हाथी, मिरगला री सरण
थे हरियळ धरा री कूख रा वरदांन
आवो सांवळा वन देवता

अचपळी नदियां रमै खोळै,
खळवकै किलकता नीभर,
फळां, फूलां, हरी द्रोवां, रो कियां सिणगार,
गवरू, अखतजोवन,
थे पधारो म्है उडीका घाट थांरी

काट थांरा रंख
काटै जे मिनख नै
व्याध है वै
स्नाप रिसियां रो जगावां
लोभ सूं हित्या करणियां पापियां नै
जग्य मे म्है बांध लावां

थे जठै होवो मेघ धिर आवै छतर ज्यूं,
थे पवन रा दोस पी निरमळ वणावो,
आसरो दो आसरम नै
म्है रसाळां सूं भरां खोळा

दमकता जुगनुवां रै, पागियां रै, हाल ओठै
 भूलता मारग, भटकता रिदरोही
 मिनख मांदो है घणो ओ सांवळा
 थे जड़ी बूटी जगमगाती औखदी संजीवणी ले
 इण सदी रै प्राण नै पूरण वणावो
 थे पधारो इण वरण मे देवता
 वन देवता, वेगा पधारो ।

संभावना

निरासा रा उफणता समद मे पड़ग्यो हूं
 डूवणो ई अक मारग है
 अर डूव ई रह्यो हूं
 दुख रा इण विराट पारावार में
 फगत थू अवतार ले
 हाथ में इमीघट लियोड़ी
 हे अपछरा संभावना
 आव
 म्है गुचळवयां खावतो थनै भाळूं
 हेलो पाडूं-पाछो जीव जाळूं

इण गत म्हारा सगळा सुखां विलासां में
 छिप्योड़ी अ मोहिणी संभावना
 तिणकला जैड़ी, फगत अक सांस
 रूप जोवन सिणगारां मार्यै बैठा पीणा सांप
 थू म्हने चैतावै
 भरोसो देवै
 थ्यावस देय सुवाणै
 जोड़ै भावी री आंवळ नाळ सूं
 आव म्हारै मन भुवन री लिछमी,
 संभावना
 म्हारै साथै रै ।

कल्पना

जाग वनड़ी कल्पना

आपां घड़ां, की सांच रा, कीं झूठ रा चितरांम
सपना मिनख री पूरण अपूरण वासना रा
घड़ां पाछो अणमणो इतियास
उणनै गासिया देवां अरथ रा, कारणां रा
फेर उणरा काळजा सूं काढ लावां
मोतियां जैड़ा नतीजा
सूपदचां रमता भविस्यत रै करां में !

अेक थारी कूख सूं सिरजण कियोड़ी
सांच होवै रचना, खरी होवै
खुद घटी घटना नीं सांची होवै सदा ईं;

जाग वनड़ी कल्पना
थू जुग जुगां सू फगत जोड़ायत रही है
सांच री
थारै बिना जीवै अपूरण साच
थू तो मधुर पख है सांच अणघड़ रो !

अरे मत लाज म्हारी कल्पना
थू जाग वनड़ी जाग ।

वाळापण

वरसां री भीड़ में
म्हारी आंगळी पकड़चां पकड़यां चालतां
वाळापण
थूं कठै छूटग्यो लारै !

आव बगत री रेत में वणावां घरकोल्या
थारै मुंडा री निस्पाप मुळक नै
दिनूंगां फूलां ज्यू धोवां
तारां भरती ओस सूं

इचरज करां

अर रग विरंगी पीपळचां रै लारै भागां
नीद में थनै कांई कैय जावै कुदरत
जे थूं मीठो मीठो मुळकण लाग जावै !

आव, म्हनै ई चालणो है थारा परीलोक में
पूछ, म्है थारै मन में ऊठता
लाखां सवालां रो करूं समाधान
थू थू खुद ई जाण जावैला अलेखा जवाव
गिळगिचियां सूं रमतां
कै पांणी में छपछप फुदकतां, भीजतां !

अदभुत ही ओप थारै अंगां री
तो ई लाघै कोनी गमियां पछै
इण अंधरीज्योडा बजार में
म्है थनै हेला पाडूं
सायत पिछाण लै थूं म्हारो सुर
आव म्हारी आंगळी पकडचां चालता बाळापण ।
आव !

भरोसो

थू होवै, तो अचींत्यो अदीठ ई सांचो
अर थू कोनी होवै
तो परतख दीसतो सांच ई कूड़ो
भरोसो अलख कमाई है मिनख री

आव भरोसा !
मैं थारै ई भरोसै हूं !

थारी मूंजड़ी पकड़ म्हे चढ जावां भाखर
कूद जावां अगन में
उडलां अंतरिच्छ में, तिरलां समंद में !
आधा इंच आगलो पहियो
अर आधा इंच लारलो पहियो
जमी माथै टिकायां
साइकिल चलावतो मिनख थारै पांण ई आगे वधै
आगे वधै सगळो ग्यांन विग्यांन थारै पांण

समाज रा संवंध कुण वणावै ?
अेक दूजा सूं जुड़ै लोग थारी रेसमी सांकळ सूं
थारै कारण सीता रैयगी रावण री मांद में
थनै पाछो बुलावण देवणी पड़ी अगन-परीछा ।

थूं अकथ ताकत है प्राणां री, भरोसा !

हरख

नींद खुलतां ई म्हनै हरख होवै
जीवता रैवण रो, नूवै दिन रा दरसण करण रो
हरख नीरोग रैवण रो
हरख कमावण-खावण रो
हरख सिंभा ताई थाकण रो, चोखी नींद सोवण रो

हरख लोगां सूं मिलण रो
समाज सूं जुड़ण रो
इण नदी अर महारांण री अेक छौळ वणण रो
सगळा मिनखां सूं प्रीत करण रो

हरख होवै बिरखा पांणी सू
 रुंखां, बेलां, फूलां, पौदां, हरी हरी घास सू
 तावड़ा सू, चांदणी सू,
 बायरा सू, आधी-तूफान सू
 रात रा अंधारा सू, दिन रा चन्नाणा सू
 इण विराट सिरजणा री अंतरधारा
 जलम, मरण, बिगसाव सू
 अर इण नरतन री मूळ सत्ता रा दरसन सू !

पण लाखां लाख लोग कोनी देख्यो थनै
 कोनी रमातो थनै खोळा में ।
 अक धार वेरै प्राणां में ई आवै
 तो जीवण रा बरस दूणा तिगणा बध जावै !

पाप-बोध

जाग बोध पाप रा !
 आतमा नै बोध
 जिणसूं पड़े उणमें दाग काळा
 रात दिन थूं चूँठिया भर चेतना रै
 डरै जिण सू जुलम करतो जीव
 शिक्षकै गुन्हा करतो !

आतमा सोरी घणी है इण जगत में
 कुण सजा दै बाबळी नै
 सजा तो मन, देह झेलै न्याव री
 अर पीड़ दूजा नै पुगावण रा करम री !

जाग सिग्या पाप री
 थूं वेदना दै आतमा नै अर बचालै
 आ सिङ्गण लागी अबूझी

अेक ई उपचार है उद्धार रो
 थूं जाग काळी वोघ कोरी चेतना रा
 पाप री ओळख करा दे आत्मा नै ।

त्याग

आव पूरण भोग, तापस त्याग

कर चुक्यां हां भोग छिण रो, अणत रो म्है
 रूप रस रो, गंध रो,
 मोहित निजर रो, परस, वांणी रो
 रतन, धन, संपदा रो
 पुरुस नारी रो
 गगन, धरती, अगन रो, पवन रो,
 इण उदघ भर मेघ जळ रो
 घापग्या हां
 आव पूरण भोग, तापस त्याग
 म्हांनै भोग सूं थू ई उवारै

क्यू कै ज्यूं ज्यूं भोग भोग्या
 भोग री बधती तिरस रै वारणै
 थाकी उमर, थाक्यो बदन,
 दो नैण दूखण लागग्या
 पग बोझ ई कोनी उठावै
 भोग तो परसाद रा परमाण जितरो अव न भावै

म्है समझग्या
 भुगतणो ई भोग रो फळ होवै जगत में
 त्याग रो आणंद भोगां सू सवायो
 त्याग ई है भोग साचो
 आव पूरण भोग तापस त्याग ।

प्रेरणा

आव म्हारी प्रेरणा परणी-पताई ।

छूटतां ई हाथ हथलेवो
घरां आई महकती मेड़ियां में
घणी भोळी अर अवूझी,
जागती,
की सोधती, कीं समझती
थूं अरथ सू अणजाण,
डरियोड़ी, झिझकती ।
म्है निरखतो रूप निरमळ
जगत में वधग्यो सुरग री सीव ताई

आज म्हारा पथरणा में घोर खीचती
अडोळी, धापियोड़ी,
यूं पसरगी खुद, म्हनै अव कुण जगावै ?
कुण मंगावै मांग मुकताहळ समंद सू
कुण तुडावै फुणगियां टंकिया सितारा
कुण म्हनै विड़दाय, म्हारो वळ बधावै

आज पाछी गरज पड़गी है म्हनै
अे प्रेरणा !
थू सेज म्हारी आव
थोड़ी झिझकती, सपना सजाती,
सोधती, भोळी, अवूझी

भर सवागण 'मांग में सिंदूर म्हारै
आव म्हारी प्रेरणा परणी-पताई ।

तिरस

जाग अणछक तिरस
थू भरिया समद सी
नैण, होठां, कंठ में,
तन-पोर में, नख-केस में, मन-प्राण में
आ बैठ अणछक तिरस थू भरिया समद सी

थू लगा प्याऊ
कनक भारां अटूटी धार,
म्हारा प्राण तिरपत होवै उठा लग कूढ़ियां जा
दरसणा सूं धापणो अधरम गिणीजै,
नैण सैजळ होय थारो रूप पीवै जुगजुगां सू
होठ थारो मद परस सिकुडया न दाइया
कंठ मे ऊग्या न कांटा
रोम में रसभीड़ वोले—
'और कूढ़ो, और पावो'
कुण होवै तिरपत चळू भर दरसणां सूं
अक चिमटी परस सूं, कण हेत सूं

हाय जीवण है कितो व्यापक
अलेखां रूप रस में
और पल्लो वैत भर रो खोळ भरवा नै
कंठे मावै अणत आकास
नेतर दोय, काया पांच छ फुट,
अक कोरो मन भटकतो

पण छकयोड़ा मिनख है अणगिण जगत में
जीवता ई जे मरघोड़ा ।
जाग उण में
जाग अणछक तिरस थू भरिया समद सी !

संकोच

आव मन संकोच सब रै ।
मारतां कोई मिनख अणजाण नै,
अर चोरतां धन, दावतां धरती पराई,
पेट माथै मार लातां—
पटकता परण्या गरभ नै,
बैन सूं धंधो करातां अंग रो,
अर टावरां नै कूटतां,
मारतां बिन वात कोई जीव नै
आव मन संकोच सब रै

मिनख है मूधो घणो
वै कैयग्या ग्यांनी
कै लख चौरासी भटकतां जूण मिनखां री मिलै
थू रंग रा कर भेद
जातां रा, धरम रा, वरग रा
दोयण वणांतो, कर मनां संकोच

कर मनां संकोच
धन रै कारणै थारा वदळग्या
हेत रा व्यौहार
थू छळकपट, चोरी, लाव-लालच में घिरीज्यो
मिनख रो दूवै पसीनो
सीव धरती री उकेरी,
देस म्हारो देस थारो कै भिड़ाई फौज
लाखां नै मराया
फगत थारी मूछ अर तुरा किलंगी
अखत राखण

थू मिनख रो कुण
बता थू देस रो कुण
जद कुटम रो ई नहीं है ?
अँ झुरै बूढ़ा बडेरा

वै कचेड़ी में लड़ै दो बंद-भाई !
 थे बणाई कै बचाई—
 जद जिनस बणगी लुगाई ?
 यू धरम काई रुखाळै ?
 कांम जद विपरीत करतो होवै जगत रै
 अर करे विपरीत कुदरत रै !
 आव मन सकोच सय रै !

उपज

आ उपज !
 सौ सौ गुणी वध ।

आ, धरा सू, गिगन सू,
 नित कळ मसीना सू,
 मिनख रै बूकिया रो, मन-मगज रो जोर लै
 विग्यांन नै इण काम गाड़ी जोत
 कर दै कनक मूँधी रज
 आ उपज ! सौ सौ गुणी सज !

म्है गिणां संख्या अरव में
 बस अरव हां पांच
 पांच मुंडा जीमवा नै,
 पांच तन, सुख पोखवा नै
 बस अरव हा पांच

पण है हाथ म्हारा दस अड़व
 दस अड़व पग है, पंख है,
 अर ग्यांन रा घर दस अड़व

चीज रै लारै फिरै जद चीज री कीमत
 आ उपज
 सौ सौ गुणी वध ।

खेम

आव म्हारी खेम
पूछण आयग्या मूसळ लियोड़ा, बारणा खड़खावता,
वै रात आधी, गाव रा जूना मंसाणा सूं

आव म्हारी खेम
लेली म्हैं दवायां डाक्टरां री
वैद रा धासा पिया
ली गोळियां म्हैं साव राई ज्यूं हकीमां री
आव म्हारी खेम
म्हारै मन तणावां अर अपूरण वासनावां री
जगां खाली
आव म्हारी खेम
म्है वरजिस करू नित ऊठ वेगो
सांस साधूं, योग रा आसण लगाऊं

आव म्हारी खेम
धन, घर मे धरचोड़ो मोकळो
जुद्ध म्हारो देस कोई राज सू कोन्ती करै
म्है नेम राखां, धरम पाळां.

आव म्हारी खेम
म्हैं कुदरत जिवावैं ज्यूं जिऊं
म्है अेक सुर इण रागणी रो
अेक तोड़ो ताळ इण नरतन तणो हूं
रूप री आकार इणरी धूप-छीया रो
ज्यूं निभै बस इण धरा रो नेम
आव म्हारी खेम ।

गाढ़

आव गाढ़

बैठ म्हारो हीया रा हिंडोळा में

अँ वीखा ई वीखा रा जंगल

हरख ई हरख रा सरवर

जठीनै देखूं, उठीनै—

अजाण्या असैधा असमान

घणो डरचोड़ो है मिनख रो आपाण

आखी ऊमर बीत जावै फल री उडीक में

आव गाढ़ ! थारै कारण ई है पगां में करार !

घटना-दुरघटना, सगळी गई परी होणी रै हाथां

कुण जाणै कांई होवैला आगलै पल-छिण,

टूटै है बीजळी, गाजै है मेघ,

बाजै है बायरा रा गुणचास वाजणा,

अंधारा रा इण अमावस महरांण में—

थारै पांण ई दीसैला कालै रो ऊगतो भांण

चंचळ प्रांणा रो धड़को थांम

थारै पांण ई जागणो है म्हानै—

करणो है जाप

आव गाढ़ !

ईसको

आव ईसका !

जे कीं म्हारो है जीवन में, वो गमै नही,

कोई खोस नी ले जावै,

म्है करूं रखवाळी, थारै साथै ईसका

कैड़ो ई ओपरो
कैड़ो ई स्वारथी लागो म्हारो वरताव
म्हारी चिरमियां, म्हारा गड्डा-कंचा,
म्हारो वरतो, म्हारी पाटी,
घणो प्यारी है
थारै कारण ई रखाव है, म्हारा ईसका

थूं रसायण है
प्रेम, धिणा, दुख अर डर रो
थारै आयां म्है सम्हाळूं म्हारी सिरड़
म्हारी रीस, म्हारी वाण कुवाण,
म्हारी चिड़
म्हारी प्रीत कोई क्यू ले जावै
आव ईसका, म्है राखूं फगत म्हारै ताई

भगवान रो ई दूजो नांम ईसको
इण कारण वाइवल बतावै—
कोई दूजा देव नै मत धोको,
सगळा धरमां नै छोड़, आ जावो म्हारी अकली सरण में
घणो प्रेय है थूं ईसका
आव ईसका ।

बस्ती

आव बस्ती
अकला तो ऊभग्या इण सून रा पसराव में,
आ मून कद तांणी सुहावै !
वात वंतळ रोज खुद सूं ई करै कितरी
अवै तो आत्महित्या करण री मन में उमावै !
ला, मिनख, लड़ता, झगड़ता, प्रीत करता,
आव वंतळ वात करता कीं पडोसी,

ईसका में जीवता, मरता, जलमता,
 रीझता, नीहाळता, भर भर नयण वै,
 लुक छिप्योड़ा आपरा घर डागळां सू-
 वारणां सू—
 और कूची रा कियोड़ा काच-काणां सू

जी अमूझण लागग्यो है,
 ला पसेवो मिनख रा तन मन वदन रो
 अेक सौरम !
 म्है तिसायां हां, मिनख रो दूध म्हांनै पा,
 विण साथै, करा मावो, पियां मदवो,
 हरख सू नाच गावां,
 पीड़ होवै तो रोयलां साथै
 कठा लग वीण, पोथी, छांव लै बैठां
 फगत आकास रै हेठै,
 लियां रोटी,
 पसरता रेत रा मरु में अकेला जीव म्है ?
 आव वस्ती !

न्याव

आव न्याव !
 जलम्या नै होया फगत छः दिन
 कोई सजा लिखग्यो म्हारो पूठ साथै
 पढ़ कोनी सकूं, फगत मुगत रह्यो हूं
 जुग रा जुग बीतग्या
 म्हारो गुन्हो तो बताव—आव न्याव !

आखो दिन करूं मजूरी, पूजूं पसीनो
 सैठा है मन मगज अर अंग म्हारा
 फेर ई घास री रोटी क्यूं ले जावै वनविलाव !
 आव न्याव !

क्यूं कोनी म्हारा कमीज रै अदीठ जेवां
 काई कारण, कोनी बँवा में बेनामी खातो म्हारो
 गुंडा क्यूं कोनी करै म्हारी मदद
 कीकर बड़ग्या म्हारा खेल में, हर कोई रा द्राव !
 आव न्याव !

अ झूठा, छिछोरा,
 नट और नटणिया करैला राज ?
 अ देस नै कुतर खावणिया तस्कर होवैला साहूकार ?
 अ फरजी, हाका करणिया,
 कद सूं वणग्या मौजीज ?
 म्हैं हमेस करुंला काम ?
 अ हमेस करैला टेलीफोन ?
 आ व्यवस्था तो पोची है सार्त
 आव न्याव !

आजादी

आव आजादी !
 मुगत कर भिनख नै
 दूजा भिनख री राजसत्ता दासता सूं !
 मुगत कर धन री रगत पीवणी चतराई सूं !
 मुगत कर भूख सूं, गरीबी सूं,
 बेकारी निकरमाई सूं !
 मुगत कर चमड़ी रै रंगां रा दीखता अळगाव सूं !
 मुगत कर घरम रा, जात रा, देस रा आग्रहां सूं
 मुगत कर राग, रोग, मरण रा डर सूं
 मुगत कर कुदरत री मेहरबानी सूं
 मुगत कर मसीनां सूं
 थड़ियां सूं, आंछी गत सूं

मुगत कर बरसां वासी धारणावां सूं
 मुगत कर इण भांत—
 कै म्है खुद नै सोधलां,
 जीवलां खुद री जीवणी !
 अर इत्ती विराट करलां चेतना नै—
 कै म्हारै मांय कर जलमै नया ब्रह्मांड;
 नया धरम, नया ईस्वर !
 आव आजादी !

प्राथना

प्राथना करू देवां, प्राथना करूं !

आवो,
 आप आप रै भोळायोड़ा करो काम,
 मिनख नै करो सुखी,
 करो इण जग्य नै सफळ !

टावर ज्यू लड़णो छोड़—
 मिनख अर कुदरत करै पूरण अेक दूजां नै,
 विग्रह अर तणाव टूटै—
 मिनखां रै सिरज्योड़ा समाज रै संबंधां रा,
 आत्मा होवै नचीती, प्रांणां नै मिलै फुरसत,
 इण ब्रह्मांड में सिरजां देवस्त्रिस्टी रा जुग !
 देही अर चेतना बधै
 आप सगळां रै पधारयां ई !

म्है तो चढांऊं हूं पुजापो
 सवधं रो, रूपां रो, रंगां रो,
 सुरां रो, सौरम रो, सवादार् रो,
 सरधा रो, भगती रो, निरमल भावनावां रो,
 हेत रो !
 म्हारी अरज सीकारो,
 आवो देवां ! म्हारै जग्य में आवो !

□

‘पण काई इतो सरळ है भावना सूं
 जुड़घोड़ो, संग्यापण टूटणो ? काई रूप, रस,
 गंध, गीत सूं कोनी हो सकै संग्यापण ? मत
 मित्तो, मत बोलो, मत देखो अक दूजा नै, तो
 ई अक दूजा री खेम कामना, अक दूजा रा
 गुणा अवगुणा रो अहसास, अक दूजा रै
 होवण रो बोध अर जाणण रो गुमान, काई
 अक दूजा नै भावनालोक में जुड़घोड़ा कोनी
 राख सकै ?’

पुजापो

1987

● सनेत्तो ● ये हो ● बोली ● मिलण ● कामण ● हठ
 ● लोरी ● माध्यम ● हरख ● परस ● मस्ती
 ● कृण ● मूलणो ● पुजापो

सनेसो

म्हारो सनेसो देवण नै
म्है थारै कनै जिण किणी नै भेजूं;
म्है सोचू-
वो खड़खड़ावैला थारी मेड़ी रा किंवाड़,
सवालिया निजरां सू थै उधाड़ोला वारणो,
थारी, बैठक में ले जाय, चांद तारां री जाजम माथे
पूछोला म्हारी खेम-साता,
उणरा हाथां सू सनेसो लेवतां
परस करैला उणरा हाथां सू थारी आंगळियां
कीं तो सरभरा करोला थे उणरी

इण कारण खूब सिणगारूं म्हारी दूती नै,
लगाऊं अतर फुलेल,
अर हिया रो संपूरण हेत उणरै अंग अंग में राळ
उणनै भेजू छिलोछिल थारै कनै

उणरै पाछा वावड़ियां
करूं इतो लाड, इतो दुलार,
जित्तो कोई कोनी कियो आपरी प्रिया रो ई आज दिन
पछै भलाई वा दूनी होवै
म्हारा उसांस लियोड़ी पवन,
प्रांणां रा आव री किरण,
झबूकता हिया री आहट
कै म्हारी पूजा लियोड़ी आरती
म्हनं पुरो रो पुरो पुगावै थारै कनै, म्हारो सनेसो ।

थे हो

खीर रो प्यालो भर, रोजीना कोनी पुगावोला,
पलंग माथें बैठ म्हारें माथें हाथ कोनी फेरोला,
म्हारी सार सम्हाळ कोनी करोला,
वातां कोनी पूछोला,
कोनी मुळकोला, कोनी निरखोला,
कोनी बुलावोला म्हनै मिंदर में,
वगीचा में, समदर रै कांठै,
कोनी हरखोला म्हारा हरख में,
कोनी छीजोला म्हारा कसाला में,
कोई वात कोनी,

थांरा हीया में म्हारो चेतो है,
थे म्हारें नैड़ा हो,
थांरो परसाद मिलै म्हनै हर जगां,
अर थांनै सिमरतो म्है सोवूं, जागू,
अर सगळां सू वडी वात—
म्हनै ओ भांन है कै—
थे हो !
घणो इत्तो म्हारा आपांण सारू
इण बोध रा मोद में—
आ जातरा तो पूरी कर ई लेऊंला ।

बोलो

थे कांई सोचो
थे दूजा लोगा नै दरसण देवोला,
तो म्है कोनी देखूला थांनै ?
थे देवोला वरदांन कोई नै

तो काई म्हारै खोळा रो पल्लो, रै जावैला खाली ?
 थे मुळकोला कोई साम्हे
 काई म्है कोनी रीझूला थारै मन रा उजळास माथै ?
 अर काई थारो परसाद,
 कोई भगत म्हारी निजर लागां विना,
 ले जा सकैला आपरै घरै ?

थे आवोला बगीचा मे—
 तो काई कोरी घास ई विछैला थारा चरणां हेठै ?
 थे जागता बैठा होवोला रात रा पिलंग माथै
 काई म्है कोनी होऊंला छिपियोड़ा अंधारा में ?
 चांद तारां रो जगमगती उजास में ?

थे जद ऊग समदर रै कांठै
 निजरां पसारोला
 जळ थळ गिगन रा मिलण-खितिज तांई
 काई म्है कोनी होऊंला
 उडता पांखी ज्यू ढळता सूरज रै सांम्है ?

थे काई सोचो !

मिलण

छानै मिलण रो कोनी उमावो म्हानै !
 लोग देखै, ईसको करै,
 म्हने होवै गुमेज,
 म्है करूं थारा बखाण, थे लाजो,
 रूवरू अर पीठ पिछाड़ी
 कोड तो साव चवडै होवै जद ई
 जीवण घट भरै रस रा रसायण सूं

थांरा गीत गावतो फिरूं मैफल मैफल,
 आंसू रा धारोळा उतरें म्हारें गालां माथें
 हिचकियां आवें म्हनं वेळा कुवेळा
 थानें चितारतां, पांतर जाऊं म्हें
 इण संसार मे म्हारें जीवण रो अरथ !
 तो लोग जाणें ई म्हारी प्रीत,
 अर प्रीत रा प्रभू—थानें
 छानें मिलण रो कोनी उमावो म्हानें

वार तिवार तो मिल जाया करो मोवीड़ा
 उण दिन तो सगळा ई मिलै अेक दूजा सू—
 राखी नै भाई वैन,
 सराध में जीवता मरियोड़ा,
 होळी नै रंगां रै मिस,
 दिवाळी नै रामां सामां करण नै,
 मेळा में, जीमण में, खेल में, ख्याल में,
 सभा में भासण में,
 हाट बजार में, तीरथ में,
 चवड़े धाड़ें कठें ई मिलो भलां ई—
 छानें मिलण रो कोनी उमावो म्हानें ।

कांमण

दडी नै ऊंची फेंकणी अर पाछी झेपणी,
 ओ कांमण रो छिण होया करै

बूढ़ा मास्टर रो मिलणो अर बोलणो—
 'हाय कित्तो मोटो होयग्यो थूं ?
 कैडो म्हारा खोळा में दुवरु जावतो
 जद गाजता मेघ अर पळकती विजळी
 थूं तो जवान होयग्यो रे !'

अर म्हारा टावरां नै बतवणो म्हारो-
 'अै म्हारा गुरुजी है !
 बाळापण नै उछाळ, पाछो झेपण रो
 अँडो ई अेक कामणगारो छिण होवै !

फेर फेर सोधू ओ ई कांमण रो अलौकिक छिण,
 जलम, जीवण अर जवांती रो-
 जद म्है बतारुं लोगां नै,
 आ म्हारी मानेतण ही,
 म्है रह्या करतो इण कनै,
 घर सू घबका देय काढचां पैला !
 जीम्या करतो इणरै हाथां सू
 कचकोळिया रै खणकारै !
 आ करती म्हारा लाड, म्हारा कोड,
 म्है सिणगार हा अेक दूजा रा सेजां में
 म्है सराई पोसाकां अेक दूजा री
 उडीवया अेक दूजा नै,
 अर घुळग्या अेक दूजा में-
 छाछ अर माखण ज्यूं,
 मिसरी ज्यू मुडा में

कुण जाणै
 किसी गाज रै गरजण
 कीकर छिटक पड़्या आगा अेक दूजा सू
 नदी रा दो पाटां ज्यूं,
 कै तरसग्या दरसण नै !
 बांसरी अर मोर पांख रैयगी फगत
 म्हारै कनै, पूजा करण नै
 अर म्हारै सुखी जीवण री कांमना -
 उणरा हीया मे !

कांई बतारुं !
 कोई देस में, कोई काल में, कोई रूप में,
 म्है अेक ई हा दोनूं !

हठ

अठा सूं कठै ?
आ परकमा तो पूरी होयगी लागै
मरणांत माथै आयग्यो है मारग
जद थे कोनी देवो आऊकार—
तो कठै चढ़ाऊं फूलां री अंजळी !
हेठै घरदू वासरी ?
भूल जाऊं गायोड़ा गीत ?
फैंकूं आरती री थाळी समद रै मंझधार ?

कै लिखू नया गीत
पूजा सजाऊं पाछी
पाछी करूं जातरा जलम सू सरू
जठा सू पैली करी ही ?

थानै अर थारा मिजाज नै बदळण री
तो संभावना कोनी
अर ना बदळैला म्हारो ठरको
वै रा वै सभाव है दोना रा !

फगत साधन बदळ सकू
रीझ री जगां रीस,
गीत री जगां गाळियां,
फूलां री जगां भाटा !

थानै सागो करणो पड़ैला म्हारो
पूरी करणी पड़ैला परकमा म्हारै साथै !
महै जिकी साधली है साधना,
अकारथ कोनी होवण दूं ला -
थांरा ओपरा बीवार सूं !
जीलूंला महै अठा रो अठै
अठा सूं कठै ?

लोरी

सोजा, नचीती हो सुयजा !
महै जगाय दूला थनै दिन ऊगां
केसा में आंगळियां उलझाय,
हरजस गाय,
गिलगिली कर पगथळी रै
गाल माथै चूमो देय !
अबै सोजा !

रात घणी चढगी
थूं आंख में कस ई कोनी घालैला
तो वगत माथै ऊठैला कीकर
अर आखो दिन आंख में जागण भर
कांम कीकर करैला ?
थाकगी होवैला म्हारी ब्हाल !
अबै सोजा !

वाट जोवै सिराणै ऊभा सपना
मन री अणमणी वासना वाट जोवै वारै निकळण री !
विछावणा नै ई हर आवै, थारै निवास री,
तकिया नै माथा रा केसां रै सौरम रो,
अर रजाई नै थारै अंग रै च्यारुंमेर लिपटण री !
मत तडपा कोई नै
वती वडी कर अर सोजा ।

माध्यम

म्हारा गीत पावड़िया कोनी थारै मिंदर रा
जिका चढ़, महै आऊं थारै अंतरपटां लारै !
म्हारा गीत कोनी रेसम री डोर

जिकी नै पकड़,
 स्यारो लेय चढ़ जाऊं
 थारै हियै रा डीगोडा डूगर
 म्हारा गीत कोनी तीरथ....जळ
 जिकां में न्हाय,
 म्है निरमळ होय जाऊं तन मन सू

जे चुगणो पड़ै म्हने
 दोनां मांय सू अेक,
 तो निस्चै जाण, म्हारी जान
 कोनी चुणूं थानै, गीतां रै वदळै
 सवाल तो थानै दोनां नै साथै राखण रो है
 गीत कोनी है मारफत
 सबद म्हारी संपूरण चेतना है,
 अर गीत है उण चेतना रो राग, अनुराग, सिणगार
 गीत म्है खुद हूं
 अर थै हो सेवट पराया
 इण सारू गीतां साटै कोनी मोलू थानै
 म्हारा गीत रमेकड़ा कोनी थानै रमण रा
 म्हारा गीत फूल कोनी थारै चढ़ावण रा
 म्हारा गीत पावड़िया कोनी ।

हरख

आज थारो रोम रोम पुळकै
 कोई हेताळू आयो दीसै मिलण नै
 जिकां री उडीक में अणमणा हा थे

आज हरख सूं लैरावै थारो मन
 कोई प्रेमी लायो दीसै प्रेम रो पुजापो
 जिकां री पूजा री उडीक में वेचैन हा थे

आज थारा प्राण झूमे है गहळ में
कोई मेळू रातवासो करण नै रुकग्यो लागै
थारी मेड़ी मे !

जिका नै वधावण नै
थे सिणगार सजायो च्यारु भीता रै

आज थे पुसव ज्यू विना कारण हस पड़धा
दिन ऊगां, दिन ऊगां ।

रात रा कोई अणत कथा कैयग्या लागै,
चांद तारा थारा कानां में

आज थे देही में कोनी लागो
किसी किरणा री चांदी डोर फेंक—
थाने बुला लिया दीसै चंवरी में कोई,
जिका रा अमर सवाग री टेक लियां
बैठा हा थे माया मे अटाळ घालिया

आज थे अणमीत फूटरा लागो ।

परस

थारा तो हिया सूं
अेक गुलाबी किरण रो बारै निकळणो
अर म्हारै प्राणां रा पोयण रो खिलणो
कैड़ा होया जै स्त्री क्रिष्णा

सौरम रो अेक आखो वादळो
पसरग्यो सरवर माथै,
गैली पवन रमण लागगी म्हारा गावां सू
उडीकै हा भंवरा
उड़ उड़ झाकण लागग्या म्हारा हिया में
मंडरावण लागग्या म्हारा घर रै ओळूं दोळूं

अर गूँज गूँज मचायो इत्तो कळरव, म्हारा प्राणां में
 कै विसरग्यो म्हनै म्हारै विगसण रो उमावो
 अर म्हारै ध्यान री अेकाग्रता टूट
 म्हनै दाक्षणो पड़चो थांरी अलेखां
 आकरी किरणां में

थारै दियोडा रूप नै
 देख ई कोनी सकी
 नीचै मुंडो झुकाय दरपण में
 नाच ई कोनी पाई इण लाभ रा मोद में
 गा कोनी सकी थारै म्हारै सगपण रा सींठणा
 इण पैली ऊग्यो सिझा रा गिगन रो तारो
 अर म्हनै बंद करणो पड़चो
 म्हारै रूप विगसाव रो आकार
 म्हारै प्राण-पराग री मजूस
 थांरो परस, अपरस ई रह्यो म्हारा जीवण में ।

बस्ती

इण बस्ती में अबै कांई रैवणो
 आखो दिन थे रैवो बारै
 अर आखी रात थांरा बारणा रैवै बंद
 इण गळी सूं तो ऊठगी थांरी सौरम
 अबै इण बस्ती में कांई रैवणो

फगत रैयगी है थांरी निरमळ गति अर आवेग,
 झरणा नदियां मे,
 जिकी कोनी भावै म्हारै सामरथ री झोळी में
 फगत रैयगी है थारै प्राणां री पुलक,
 दिखणी पूंन में,
 जिकी कोनी बंधै म्हारी भुजावां में

फगत रैयगी है थांरी देहाभ,
 अकास रै रोसणी आंचळ मे,
 जिकी म्है परस कोनी सकू
 बस सुणीजै थांरी हंसी फूलां में
 जिकी कोनी मावै म्हारी थाळी में
 थै कोयल रा कंठा में गावो
 पण कोनी समझू म्है
 सुर या सबद थांरी भासा रा
 जुड़ाव तो कटग्यो हो आंवळ नाळ कटतां ई
 थारै कनै रैवण रो उछाव ई रीतग्यो अवै तो
 अवै कांई रैवणो इण बस्ती में ।

कुण

अक दिन भेली होई पंचायत
 अर म्हारै कनै मांगियो खुलासो
 म्हारै सबंधा रो, थारै साथै

साचांणी आपा कांई लागां अक दूजा रै ?
 काई लागै हाथ पग, पेट, आंख,
 मगज, हीयो, रगत, म्हारै ?
 काई लागै चेतना म्हारै ?
 कांई लागू चेतना रै म्है ?

अै हरख, सोग,
 राग, प्रेम, क्रोध, काम,
 सगळा मनोविकार कांई लागै कोई रै ?

काई लागै कुदरत मिनख रै ?
 हरिया रुंख, वैवतो जळ,
 हथिणी गत हालती पून,

धरती, अकास, अगन ?
कोई अणत, कोई छिण भर ?
कोई विराट, कोई चिरमी गट्टो

समाज मे ई कुण लागै किण रै ?
जात, धरम, परिवार,
सगळों री रचना होई आपां रा अनाड़ी हाथां सूं ?
अै कद साधै कोई नै, अै कद ढाबै कोई नै ?

इण विराट सुदरता नै
म्है कोनी चितारिया पति ज्यू
अेकला म्हारा कोनी वणाया
भाई, भायला, ज्यू, अणजाण ज्यू,
मालक ज्यू, ठाकर ज्यू,
राजावां रा राजा ज्यू
म्हैं समायोड़ो हूं इण अणत में
ज्यू ओ विसाईं खावै म्हारै मांय !
म्हारो आकरसण-विकरसण,
निपजै आपरा खुद रा नेमां सू !
म्हैं अेक दूजा नै सोघां, लाधां अर समझां,
आप आप रा संस्कारा सूं !

सुदरता में, करुणा मे, प्रेम में
उणनै थेपडू म्है !
तो निश्छळ, निस्कपट अंतर में,
रातवासो करै वै ई
घुळियोड़ा अेक दूजा में ?
काई बखाण करूं म्है म्हारै संबंधां रा,
पंचां नै काई बताऊं ?

भूलणो

ज्यू भूलग्या थे
सिस्टि री रचना कर, उणरो कारण,

अर मतै मतै वधण दिया सगळां नै
 परायां नै वस में कर, दूजां नै मार दूजां रो नास कर
 थे तो भूलग्या होवोला
 अेक दिन दरसण देय,
 ये म्हारै नैणा मे जगाई अेक उडीक,
 म्हनै वतळाय,
 ये म्हारै मन में जगाई अेक तिरस,
 म्हनै परस कर,
 म्हारी देही नै जगाय दी थे
 अेक सवेदन भरी वीणा रीक्षणकार में !
 क्यूँ कै थांरी आ वांण है
 सगळा प्रेम प्राथनावां में जमियोड़ा
 हेताळुवा साथै रोजीना, इकसार !

पण म्हनै याद है हाल
 वै बीजळ दरसण रा झमका,
 वै परस रा राग रंग रचिया छिण,
 जद म्है, बिना आगली पाछली रो विचार कियां
 धारली मन मे
 कै थांनै म्हारै वारै कोनी रैवण दूला
 अर म्हारी पूजा सूं
 थांरी मानता नै कर दूला इत्ती अलौकिक
 के थारा गीत गायां ई जाऊंला
 जलम जलम !
 जठा लग कोनी होवै अेकाकार
 आपां रा आपा,
 अर मिट जावै आपांरा न्यारा न्यारा आपाण !
 थैं तो भूलग्या होस्यो !

पुजापो

पुजापो संधाण है आणंद अरण रो;
 जठै म्हारो वण सकै आसरम,

चीड अर देवदार रा रुंखां वीच,
 हरिया हरिया आसापाला री
 निरमल ऊंची उठाण में !
 जठै किस्तूरी मिरगलां साथै
 भटक सकै म्हारो मन !
 जठै घिर घिर आवै करुणा रा मेघ !
 खिलै फूल होठा में,
 जठै उणनै कोई तोड़ै-मसोसै कोनी !
 जिकां में रळकता हेत नीक्षरां मे
 म्है बुझाऊं तिरस
 अर उमड़ता अंधारा में
 हरी हरी गोली घास माथै लुट सकूं !

थारो म्हनै देखणो भरपूर निजरां,
 मुळकणो
 चन्नण देही री रुंवाळी रो सिहरणो,
 म्हनै देयग्यो गंध रो गिगनार !
 थांरी बोल-वतळावण, गीत- संगीत, परस,
 म्हनै करग्यो सबद बिहूणो,
 बीजळ सैचानण !
 थांरी मनवारां, हेत-सत्कार, पूछ परख सूं
 म्है लैरीजतो रह्यो सरप ज्यूं;
 अर गरब करतो रह्यो थांरी ओळखांण रो,
 मिजाज पुरसी रो !
 अच्छेही आणंद रो मारण हो ओ
 इण निरजण अरण में !

आणंद सरोवर रा ओटा माथै
 म्है खावण बैठग्यो विसाई
 तो इण थिर जळ रा लाल पोयणां ज्यूं
 थांरी पीड़ सूं हुई म्हारी चौनिजरी !
 थनै सुखी करण रा कळाप
 म्हनै बटाळ ज्यूं आगै वधण रो दियो कारण

म्हैं घणा सपना भाळिया;
 अर सतदळां रै हेठै अंतरलोक में पूगण रो,
 पीळा पराग नै खंखेरण रो उमावो,
 म्हनै देयग्यो आणंद पुरवाई रो परस !

घणो मोद होवै लोगां मे ईसको जगावण में,
 गहळ रा आणंद है लोगां रा बोल सुणण में
 कोई आंगळी दिखावै—
 तो लागै जाणै तारो टूटियो है अकास में
 अर रेख खिचगी है कनक ओप री

मुंडो मरोड़, अबोलणा, मान,
 म्हारा हीया नै पुगाय दियो आणंद री माठ ताई
 थारो रूखापणो म्हनै देयग्यो—
 माखण जैड़ा सबद, कविता री कुरळाट मे
 अणत आणंद भोग्यो है म्है थारी उडीक रो
 ओ हेत, हेत री तड़प,
 पूजा, आराधण, कल्पना, कांमना,
 अर म्हारो सिखर समरपण
 म्हारी प्रणति नै पुगाय दी है
 उण मोहनी, सरव व्यापी, देवी सत्ता ताई
 जठै आणंदमय है वारली अर मांयली
 जीवण ऊरजा
 म्है आणंद समाध में हूं
 इण आणंद अरण में ।

□

